



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines



Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



2234.130.31

Harvard College Library



GIFT OF THE
BRITISH AND FOREIGN
BIBLE SOCIETY
LONDON

② Bible. Acts. Uripiv. (1905)

NOLOLIEN NE APOSTOL NIRI,
ERIJEN URIPIV,
MALEKULA, NIU EBRIDES.

*The Acts of the Apostles, in the language of Uripiv,
Malekula, New Hebrides.*

BRITISH AND FOREIGN BIBLE SOCIETY
(MELBOURNE AUXILIARY).

Melbourne :
ARBUCKLE, WADDELL & FAWCKNER, PRINTERS, McKILLOP ST.

1905.

224.130.31
3

Harvard College Library

Sept. 23, 1910

Gift of the

British & Foreign Bible Society

NOLOLIEN NE APOSTOL NIRI.

- 1 Nu li naul uomo nen, O Teofilos, suri nanu ga Iesu
2 ololi ko evuisuiseni, ejepari nambog ga mara tekai
ni evan mari, evitu ga ni oerai rege Nemuin On
apostol niri ga ni mu tombotombo e: ko ni eremali
3 jir, emaur, evitu ne mijen sen, nelelien elep e, eremali
jir nambog gavul ivij, ko oerai nanu suri batun vanu
4 se Atua: ko niri ara lik koroti tevi ni, ni oerai niri
sete para iveligi Jerusalem, para lik terai nanu
Tata ser oerai, ni oerai, nanu ga kama rogi rege
5 inu: Jon baptaisi e nui; ko para baptaisi kami e
Nemuin On, nambog sete pi lep.
- 6 Ko niri ara lik koroti, ara susi e ni, ara oerai,
Numal, nik kupu ligi keli batun vanu tevi niri Israel
7 leligen ok rekga? Ko ni oerai e niri, Sete evi nanu
se kami, kapa rogi uasi nambog ko daron, ga Tata
8 eligi evi ni numalnen sen, ko para lai derteren tevi
kami, nambog ga Nemuin On pi vini rege kami: ko
kami kapa evi jinib noeraien suk rege Jerusalem, ko
Judia pu su, ko Sameria, ko bogsen vanu jili iel
9 gatan. Ni oerai nanu nen, ko niri ara meteni, ara
tekai ni evan mari, ko ni etebitebi rege nambor san.
- 10 Ko niri ara meteni melerin eterter, ga ni evel, kapa
lesi, jinib eru oro tur tevi niri, sunsun seru oera-
perap, ko oro oerai, Kami jinib ne Calili, erepe kama
11 tur iel, kama meteni melerin? Iesu gel, ga mara
tekai ligi kami van rege melerin, ni pi vini keli pi
repel, erepe kama lesi ni evan rege melerin.
- 12 Ko niri ara ivel botouon Olivet, ara lui
keli van Jerusalem, nutu ga mu to muri
Jerusalem erepe mara ivel rege nambog ne Sabat.
- 13 Ko ara sili regen, ara van lolo aim ga mu to mari, ga
niri mara lik; Piter, ko Jon, ko Jems, ko Andru,
Filip, ko Tomas, Bartolomiu, ko Matiu, Jems,
Alfeus natun, ko Saimon Selote, ko Judas, Jems

- 14 natun. Niri kes ara lik, nolor sansan, ara verus,
sete ara mosi, tevi nevsevin niri, ko Meri, Iesu tasu
sen, ko ni tuan niri.
- 15 Ko Piter otur evi mari nambog nen rege livu tuan
niri, (delug ara lik koroti, erepe ogut bulen gavul
16 eru) ko oerai, Tuak niri, eres para loli jili nanu ga
naul on oerai, nanu ga Nemuin On erij tui rege
Devid jigon suri Judas, meri ga mi tekai niri ga
17 mara totokoni Iesu. Ni evi ker san, ko elai nanu
18 sen rege majigen gel. (Meri nen ouli orosel san e
noulin nololien ga mi sij sen, ko ouajeni batun uomo
19 ko ap rege livu, jinen evan vari. Ko niri jili ga
mara lik Jerusalem ara rogi uasi; ko niri ara ligi
orosel nen nisen, erijen ser, Akeldama, evi Orosel
20 ne dra.) Erepe ara uli naul ne Sam,
Para loli naim sen pi jijici,
Ko sete jinib san pi lik regen:
ko,
Jinib mu nij pi lai majigen sen.
- 21 Rege jinib niri ga mara koroti tevi ker, nambog jili
22 ga Iesu evini ko evel rege ker, rege Jon baptaisien
pi jepari nambog ga mara tekai ni eveligi ker, niri
san pi vi jinib noeraien tevi ker suri meraien sen.
- 23 Ko niri ara ligi nueru eru, Josef, nisen keli Barsabas,
24 ko nisen san keli Justus, ko Mataias. Ko ara verus,
ara oerai, Nik, Numal, ga ku rogi uasi nolo jinib
niri jili, kup vuvisuiseni kem, nueru san ga nik ku
25 mereni, ni pi lai majigen, ko pi vi apostol, ga Judas
26 ouajeni ligi pi van vanu sen. Ko niri ara liori lot
suri nueru; ko lot evan rege Mataias, ko ara ligi ni
tevi apostol esegavul dromon san.

- 2 Mianko, nambog ne Pentekost evini, niri jili ara
2 lik koroti nutu sansan. Ko gavilivil, drilan san evel
rege melerin vini, erepe lig ga mi lep eser, ko ololi
3 lolo aim ga niri ara lik regen oun saut. Ko nemer
ga mi mesek ara remali jir, erepe namb; ko elik
4 rege niri jili, evises niri. Ko niri jili ara oun saut e
Nemuin On, ko ara rij uasi nali mu nij, erepe Nemuin
On ololi niri.
- 5 Ko Ju niri sopuon ara lik Jerusalem, jinib ga
mara res, ara ivel rege vanu ga mo su gok iel gatan

- 6 evini. Ko niri ara rogi drilan nen, delug ara lik
 koroti, ko nolor ara ekarakar suri, niri jili ara rogi niri
 7 ara rij nali ser. Ko niri jili ara murarog, ko ara
 roromi suri, ara oerai, Kapa lesi, niri jili ga mara
 8 rij ara evi meri Calili rekga? Ko drama rogi erepe
 se? ker jili drama rogi niri ara rij erijen se ker,
 9 erijen ne vanu ga ker dram iak regen. Ker Partia,
 ko Mid, ko Elamait, ko niri ga mara lik Mesopotemia,
 10 ko Judia, ko Kapadosia, ko Pontus, ko Esia, ko
 Frijia, ko Pamfilia, ko Ijip, ko vanu ne Libia oto
 muri Sairine, ko niri ga mara ivel Rom vini, niri
 Judia, ko niri jinib mu nij ga mara ebitevi niri Judia,
 11 niri Kreta ko Arebia, drama rogi niri ara oerai
 12 majigen ga mi lep se Atua, erijen se ker. Ko niri
 jili ara murarog, ko ara rerelegi, ara oerai e niri,
 13 Nanu gel evi sev? Ko niri sopuon keli ara men
 ceraji, ara oerai, Niri ara oun saut e uain ga mi mer.
 14 Ko Piter otur evi mari tevi niri esegavul dromon
 san; ololi drilan evan mari, ko erij tevi niri, oerai,
 Kami jinib ne Judia, ko kami jili ga kama lik Jeru-
 salem, kapa rogi uasi nanu gel, erijen suk pi van
 15 rege boro kami. Niri sete ara minemin erepe kami
 16 kama roromi; kapa lesi evi aur itulin ne nambog;
 nanu gel evi nanu ga profet Joel oerai.
 17 Atua oerai, pi remali pi repok rege nambog ga
 vitu nen,
 Nu be jive Nemuik rege jinib niri jili;
 Ko natu noroman ko natu nevsevin se kami para
 rij erijen ne profet,
 Ko melakel se kami para matur lesi nanu sopuon,
 Ko buretera se kami para matur lesi:
 18 Igco, Be jive Nemuik pi van rege jinib ne majigen
 suk, ko nevsevin ne majigen suk rege nam-
 bog nen, kb niri par evi profet.
 19 Ko bu loli nelelien para remali rege melerin
 mari,
 Ko majigen ga mara elep para remali iel gatan;
 Dra, ko namb, ko nusne namb:
 20 Bu loli nial pi vi natomot,
 Ko navul pi vi dra,
 Pu uomo ne nambog se Numal pi vini,
 Nambog ga mi lep, ga mara murarog suri:

- 21 Ko pi remali pi repok, niri jili ga para verus nise
Numal para maur.
- 22 Kami jinib ne Israel kapa rogi erijen gel: Iesu do
Nasaret, jinib ga Atua ololi kami kama rogi uasi ni
eres, kama rogi uasi e majigen ga mi lep niri, ko
nelelien, ko nanu ga jinib ara muraog suri, ga Atua
eligi ni pu loli rege livu kami, erepe kami kama rogi
- 23 uasi; ni, ga jinib mara tekai cerasi, ko Atua orogi
uasi uomo, ko eligi erepok, ko kami kama reviji rege
nai pelaut, ko kama toro pini e nevere jinib ga mara
- 24 sij: ko Atua ololi ni otur evi mari, etelasi nerivera-
vijen ne mijen, mijen sete ololi uasi pu rototoni ni.
- 25 Ko Devid erij suri ni,
Nu lesi Numal otur rege nok tui gok vini;
Ko ni elik rege neverek imatu, ko sete para loli
uasi nu bu ruj:
- 26 Ko nolok eiri suri, ko nemek orogi eres;
Ko nimbek pi lik tevi neteravien:
- 27 Suri nik sete kupu iveligi nemuik pi lik rege Edes,
Ko sete kupu ligi Jinib On som pi vi nanu ga mi
mutumut.
- 28 Nik ku vuissuiseni nu sel ne mauren;
Kupu loli nu pu oun saut e neiren rege nom.
- 29 Tuak niri, bu oerai e kami suri buretera Devid, ga
ni emij, ko ara tevini, ko domb sen oto iel ejepari
- 30 leligen. Ko ni evi profet, ko orogi uasi Atua erij
tevi suri Ni nisen, ni pi ligi san rege ni natun, pi
- 31 sakel rege tron sen; ni orogi uasi nanu gel uomo,
erij suri meraien se Kristo, sete ara ligi ni pi lik rege
- 32 Edes, ko ni nimben sete pu mutumut. Atua ololi
Iesu gel otur evi mari, ko kem jili nama evi jinib
- 33 noeraien. Ko Atua neveren imatu ololi ni elik mari,
ko Tata sen elai Nemuin On tevi, ga mu oerai uomo,
ni ejive nanu gel ga kami kama lesi ko kama rogi.
- 34 Devid sete esa evan rege melerin: ko ni oerai,
Numal oerai e Numal suk, Kupu sakel rege
neverek imatu,
- 35 Pi jepari nambog ga bu loli niri ga mara ougasi
nik para evi nai ne belam.
- 36 Ko niri jili ne naim ne Israel para rogi uasi uretun,
ga Atua ololi ni evi Numal ko Kristo, Iesu nen ga
kami kama reviji rege nai pelaut.

37 Ko niri ara rogi; ara rogi erepe nanu san esari
 nolor, ko ara oerai e Piter, ko apostol niri jili,
 38 Tuak niri, kem namba loli sev? Ko Piter oerai e
 niri, Kami kapa roromi lueni, ko para baptaisi kami
 jili rege Iesu Kristo nisen, tevi netelasien ne nololien
 ga mi sij se kami; ko para lai Nemuin On tevi kami
 39 pi vi merenien. Erepe Atua oerai e kami, ko natu
 kami, ko niri jili ga mara lik gasu, niri jili ga Iova
 40 Atua pi verus para vini jin. Ko ni erij suri, erijen
 elep, ko eiari niri, oerai, Kami kapa maur ligi dulu
 41 ga mi kapil iel. Ko ara baptaisi niri ga mara lai
 erijen: ko niri erepe ogut ne vasegavul ne vatul ara
 42 ebitevi niri nambog nen. Ko ara lik eterter rege
 nevuuisuisenien ko korotian ne Apostol, ko ara otopoi
 otovi bred, ko ara verus.
 43 Ko metuen evan rege niri jili: ko apostol ara loli
 44 nelelien elep, ko majigen ga mi lep. Ko niri jili ga
 mara osuri ara lik koroti, ko ara ligi nanu ser rege
 45 niri jili; ko ara ouloule nanu ser ko joror, ko ara
 46 ligi evises niri jili, ara loli eres tevi niri jili. Ko mu
 muri ara lik eterter rege tempel, nolor sansan, ko
 ara otopi otovi bred lolo aim ser, ko ara aani nanen
 47 ser tevi neiren ko nolor sansan, ara suruvi Atua, ko
 delug jili ara rogi eres suri niri. Ko mu muri Iova
 eligi niri ga para maur ara ebitevi niri.

3 Ko Piter nueru Jon oro togsa poro van rege tempel,
 2 rege daron ne verusen, evi aur esuan. Ko ara uosi
 jinib san ga belan isij nambog ga tasu sen evisi
 ejepari nambog nen, ko ara ligi mumuri rege metali
 ne tempel, ga nisen Eres, pu gunugun merenien rege
 3 niri ga mara sili rege tempel; ni elesi Piter nueru
 Jon poro van rege tempel, ogoni, poro lai merenien
 4 sopuon tevi. Ko Piter emeteni ni, nueru Jon, ko
 5 oerai, Kupu meteni komru. Ko ni emeteni nueru,
 6 ororomi poro lai nanu sopuon tevi. Ko Piter oerai,
 Silver suk ejici; ko cold suk ejici; ko nanu ga nu
 tori be elai tevim. Suri Iesu Kristo do Nasaret
 7 nisen, kupu ivel. Ko ni orototoni neveren imatu, ko
 esai eraji: ko gavilivil derteren evan rege belan ko

8 bujin belan. Ko ni orau vi mari, ko otur, ko evel
 sopuon; ko esili rege tempel tevi nueru, evel, ko
 9 orau, ko osuruvi Atua. Ko niri jili ara lesi ni evel
 10 ko osuruvi Atua: ko ara rogi uasi ni evi meri ga
 me lik, epej merenien rege Metali ga Meres ne
 Tempel: ko nolor ara oun saut e nomurarogien, ko
 nororomien, suri nanu ga mu loli ni.

11 Ko ni ototokoni Piter nueru Jon, ko delug jili ara
 oulu koroti ara van jir rege deuvje se Solomon, ara
 12 murarog elep. Piter elesi, ni oerai e delug, Kami
 jinib ne Israel, erepe kami kama murarog suri jinib
 gel? ko erepe kama meteni komru, erepe derteren
 se komru ko nololien ga me res se komru ololi merel
 13 evel? Atua se Ebram, ko Aisak, ko Jakob, Atua se
 tata se ker, osuruvi Iesu, Jinib ne majigen sen; ga
 kami kama tekai tueni, ko kama musmus rege Paillet
 14 non, nambog ga ni emarog pi telasi tueni. Ko
 kami kama musmus meri ga me vi Jinib On, ko Jinib
 ga mi mauos, ko kama oerai para lai tevi kami meri
 15 ga mi reviji pini jinib, ko kama reviji pini Numal
 ne mauren; ga Atua ololi otur evi mari ligi niri ga
 16 mara mij; ko kem nam evi jinib noeraien. Suri
 nosurien ne ni nisen, ni nisen ololi merel eterter, ga
 kami kama lesi uasi ko kama rogi uasi: igco nosurien
 ga ni elai tevi, elai mauren ga me res gel tevi, rege
 17 no kami jili. Ko nu pu rogi uasi, tuak niri, kami
 kama rerelegi, ko kama loli, ko numal se kami
 18 erepok. Ko nanu ga Atua oerai uomo
 rege jigo profet niri jili, nanu ga mi
 sij ga Kristo sen pu rogi, ni ololi jili
 19 erepok. Ko nolo kami pu roromi lueni suri, ko kapa
 rieni keli, ko para teuasi tueni nololien ga mi sij se
 kami, ko daron ga me res pi vel rege non Iova vini;
 20 ko ni pu koni Kristo ga mara ligi suri kami, evi Iesu:
 21 ko ni pi lik rege melerin pi jepari daron ga para loli
 lilani nanu ga mo su gok, ga Atua erij
 suri, e jigo profet on sen, ga mara lik,
 daron ga iel gatan eremali, ejepari leligen ok.
 22 Ko Moses oerai, Iova Atua pu loli Profet san pu tur
 evi mari tevi kami, rege kami niaken, ni pi repe inu,
 ko kapa rogi ni erijen sen rege nanu ga mo su gok

23 ga ni pu oerai e kami. Ko pi remali pi repok, nemuin
 niri jili ga sete para rogi profet nen, para loli para
 24 jijici jili rege jinib. Igco, profet niri jili, Samuel,
 ko niri ga mara vijuri ni, niri jili ga mara rij, ara rij
 25 suri nambog gel. Kami kam evi natu profet niri,
 ko natu naul ga Atua oli tevi tata se kami, ni oerai
 e Ebram, Niri ne naim jili iel gatan para rogi pi
 26 res rege nik natum. Atua okoni Jinib ne majigen
 sen, ga ni ololi otur evi mari evan ji kami uomo, pu
 loli kami kapa rogi pi res, kapa rieni keli rege nololien
 ga mi sij se kami.

4 Ko niri ara rij vani tevi delug, jinib on niri, ko
 kapten ne tempel, ko Sadusi niri ara van jir, ara rogi
 2 isij elep suri niri ara vuisuiseni delug, ko ara vuisui-
 3 seni Iesu evi meraien rege niri ga mara mij. Ko ara
 totoniri, ko ara ligiri rege naim ne kaien, para lik
 4 terai mevi nen: evi iriverivi. Ko niri elep ga mara
 rogi erijen, ara osuri, ko niri noroman erepe ogut ne
 vasegavul ne valim.
 5 Ko mevi nen, eremali erepel, numal ser, ko bure-
 6 tera, ko jinib ne naul ara lik koroti Jerusalem; ko
 Anas ga me vi batun jinib on, ko Kaiafas, ko Jon, ko
 Aleksander, ko niri jili ga mara evi batun jinib on
 7 niaken. Ko ara ligi niri ara tur livu, ara susi, Der-
 8 teren se si, ko suri si nisen, kami kama loli nanu
 gel? Ko Piter, oun saut e Nemuin On, oerai e niri,
 9 Kami numal se delug, ko kami buretera, pora kami
 kama susi e komru leligen suri nololien ga me res
 ga nomoro loli tevi jinib ga derteren ejici, ko nanu ga
 10 mu loli ni emaur; kami jili kapa rogi uasi, ko delug
 jili ne Israel para rogi uasi, rege Iesu Kristo do
 Nasaret nisen, ga kami kama reviji rege nai pelaut,
 ko Atua ololi ni otur evi mari ligi niri ga mara mij,
 11 suri ni, merel otur iel, emaur, rege no kami. Ni evi
 nevut ga kami ga kama eli naim kama mus-
 12 mus, ko ara loli ni evi batun bogbogsen. Ko
 netelasien ejici rege san keli: sete nisen san keli iel
 gatan ne melerin ga mara lai tevi jinib ga ker drapa
 maur suri.
 13 Ko niri ara lesi Piter nueru Jon sete oro

- medutu, ko ara rogi uasi nueru oro evi
 jinib ga sete ara vuissuenueru, nueru oro
 evi jinib naun, niri ara murarog; mianko
 niri ara rogi uasi suri nueru, ga nueru oro
 14 lik tevi Iesu. Ko ara lesi meri ga mara loli mi maur
 otur tevi nueru, sete ara rogi uasi nanu ga para oerai
 15 suri. Ko ara oerai nueru poro van vari ne korotian,
 16 niri ara san ara sopue suri, ara oerai, Drapa loli sev
 tevi jinib gel nueru? uretun nueru oro loli nelelien
 ga mi lep san, ko niri jili ga mara lik Jerusalem ara
 17 lesi, ko sete drama loli uasi drapa oerai ejici. Drapa
 rij pi terter tevi nueru, ko erijen nen sete pi van ji
 18 delug, ko nueru sete poro rij keli suri nisen gel. Ko
 ara verus nueru, ko ara jige eterter nueru sete poro
 19 rij, ko sete poro vuissuiseni suri Iesu nisen. Ko Piter
 nueru Jon oro rij lueni, ko oro oerai e niri, Pora pi res
 rege Atua non namba rogi e kami pu omo ne Atua,
 20 kami kapu oerai: kem sete nama loli uasi namba
 21 pereper suri nanu ga nama lesi ko nama rogi. Ko
 niri ara rij keli eterter tevi nueru, ko ara ligeligi
 nueru oro ivel, sete ara lesi nanu ga para revijiri suri;
 suri delug; jinib niri jili ara suruvi Atua suri nanu ga
 22 mu loli. Jinib nen, ga mara loli majigen ga mi lep
 ga ni mi maur e, sia sen gavul ivij, ko dromon otoi.
 23 Ko ara ligeligi nueru oro ivel, oro van ji korotian
 ser, ko oro oerai nanu jili ga batun jinib on, ko bure-
 24 tera niri ara oerai e nueru. Ko niri ara rogi, drilan
 evan mari ji Atua, nolor sansan, ko ara oerai, O,
 Numal, nik ga ku loli melerin ko gatan, ko dis, ko
 25 nanu ga mo su gok ga mara to reger: ga nik ku
 rij e Nemuin On, rege tata se kem Devid jigon, ko
 ku oerai,
 Erepe niri Jentail ara rij lolaren,
 Ko delug niri ara roromi ceresen?
 26 Kig niri ne gatan ara tur erepe nuval,
 Ko numal niri ara lik koroti,
 Rege Iova, ko rege meri ga ni evaseni:
 27 uretun, rege vanu gel, rege Iesu, Jinib On ne majigen
 som, ga nik ku vaseni, Erod, ko Pontius Paillet, tevi
 28 Jentail niri, ko delug ne Israel, ara lik koroti, para
 loli nanu ga neverem ko korotian som eligi uomo pi

- 29 remali. Ko leligen ok, Numal, kupu rogi
erijen lolaren ser; ko kupu ligeligi jinib
on ne majigen som niri, para rij erijen
30 som, metuen bijici; ko nik kupu sarini neverem,
kupu loliri para maur; ko para loli nelelien ko majigen
ga mi lep suri nise Iesu, Jinib On ne majigen som.
31 Niri ara verus, ko nutu ga mara lik koroti regen
eririr, ko niri jili ara oun saut e Nemuin On, ko ara
rij erijen se Atua, metuen ejici.
- 32 Ko delug ga mara osuri, nolor sansan, ko nemuiri
sansan, ko sete san oerai nanu sen san evi ni sen;
33 ara ligi nanu jili evises niri. Ko apostol niri ara rij
suri meraien se Numal Iesu, derteren ser elep: ko
34 deresen elep oto rege niri jili. Ko sete san nanu
sen ejici: niri jili ga dan ser otoi, ko naim ser otoi,
ara ouloule, ko ara lai noulin ne nanu ga mara oul-
35 oule, ko ara ligi rege apostol belan: ko ara ligi evises
niri jili, erepe niri nanu sen ejici.
- 36 Ko Josef, ga apostol ara ligi keli nisen Barnabas
(evi natu nororomien), Livai natun san, jinib ne
37 Saiprus, ni dan sopuon otoi, ko ouloule, ko elai mani
nen, ko eligi rege apostol belan.

- 5 Ko jinib san, nisen Ananaias, tevi Safaira
2 nevsevin sen, ouloule nanu sen sopuon, ko
otori noulin sopuon pi vi sen, nueru nev-
sevin sen oro ligi erepok, ko elai noulin sopuon,
3 ko eligi rege apostol belan. Ko Piter oerai, Anan-
aias, erepe Setan evan olom, kupu cerecerasi Nemuin
4 On, ko kupu tori nouli dan sopuon? Daron ga dan
otoi evi som rekga? mianko nik ku ouloule evi som
rekga? Erepe ku roromi nanu gel olom? sete ku
5 vilivilori e jinib, ku vilivilori e Atua. Ko Ananaias
orogi erijen nen, ouajeni gatan, ko nemuin eveligi:
6 ko metuen elep evan rege niri jili ga mara rogi. Ko
nanuarig ara tur evi mari, ara numbe e ni, ko ara
uosi evan vari, ko ara tevini.
- 7 Ko erepe aur itul asi, nevsevin sen evini, ko sete
8 orogi uasi nanu ga mi remali. Ko Piter oerai e ni,
Kupu oerai e nu, kamru komoro ouloule dan noulin

9 erepok rekga ejici? Ko ni oerai, igco, erepok? Ko
Piter oerai e ni, Erepe kamru komoro roromi koporo
cerecerasi e Nemuin se Numal? kupu lesi, bela niri
ga mara tevini diuan som ara tur rege metali, ko
10 para uosi tueni nik. Ko ni ouajeni gavilivil rege
belan, ko nemuin eveligi: ko nanuarig ara vini, ara
lesi ni emij, ko ara uosi van vari, ara tevini tevi
11 diuan sen. Ko metuen elep evan rege kalesia niri
jili, ko rege niri jili ga mara rogi nanu gel niri.

12 Ko nevere apostol ara loli nelelien elep ko majigen
ga mi lep rege delug; ko niri ara lik koroti deuvje
13 se Solomon, nolor sansan. Ko niri sopuon ara
medutu para bitevi niri: ko delug niri ara rij eres
14 suri niri; ko niri ga nosurien ser otoi ara vini ji
15 Numal, niri elép noroman ko nevsevin; ko ara uosi
niri ga mara mesi ara van rege sel, ko ara ligir rege
malig ko buepe, Piter pi asi nemuin pi jepari niri san
16 rekga. Ko delug elen ara vini, rege vanu ga mi
rerali Jerusalem, ara uosi niri ga mara mesi, ko niri
ga nemuiri ga mara sij olokoloksir, ko niri jili ara
maur.

17 Ko batun jinib on oturi evi mari, ko niri jili ga mara
18 lik tevi (evi korotian ne Sadusi), ko nolor oun saut
e nougasien, ko ara totoni apostol niri, ko ara ligiri
19 naim ne kaien. Ko agelo san se Numal etasi metali
naim ne kaien natamupog, ko etakai niri ara van vari,
20 oerai, Kami kapa iel, kapa tur, ko kapa rij rege tempel
21 erijen jili ne mauren gel. Ko niri ara rogi, ara sili
rege tempel nata mu rurupog, ko ara vuisuiseni. Ko
batun jinib on evini, ko niri ga mara lik jin, ko ara
verus korotoni korotian nen, ko korotian jili ne Israel,
ko ara koni sopuon para van naim ne kaien, para tekai
22 niri vini. Ko jinib ne majigen ser ara van, ko sete
23 ara lesi niri rege naim ne kaien; ko ara lui, ara
oerai, Nama lesi metali ne naim ne kaien ara terter
eres, ko niri ga mara metemete ara tur rege metali:
24 ko nama tasi, sete nama lesi jinib san lolo aim. Ko
kapten ne tempel, ko batun jinib on niri, ara rogi
erijen nen, nolor ara sij elep, suri nanu nen pi vi sev.
25 Ko san evan, oerai e niri, Kapa lesi, jinib niri ga
kami kama kairiri naim ne kaien, ara lik rege tempel,

- 26 ara tur, ara vuissuiseni delug. Ko kapten evan, tevi
 27 jinib ne majigen sen, etekai niri, sete ololi eterter;
 28 tekai niri vini, ara ligi rege no korotian. Ko batun
 jinib on osusi e niri, oerai, Kem nama jige kami
 eterter, sete kapa vuissuiseni suri nisen gel: ko kapa
 lesi, kami kama loli Jerusalem oun saut e nevuissui-
 senien se kami, ko oto muri kami kapa ligi dra jinib
 29 gel rege kem. Piter ko apostol niri ara rij, ko ara
 oerai, Kem namba loli marogen se Atua pu omo ne
 30 marogen se jinib. Atua se tata se ker, ololi Iesu
 otur evi mari, ga kami kama reviji, kama rloni rege
 31 nai san. Ko Atua neveren imatu eligi ni mari, evi
 Numal, ko Savior, pu loli niri Israel para roromi, ko
 32 ni-pi telasi tueni nololien ga mi sij ser. Ko kem nam
 evi jinib noeraien e nanu gel niri; ko Nemuin On ga
 Atua elai tevi niri ga mara loli marogen sen, ni evi
 jinib noeraien.
- 33 Ko niri ara rogi nanu gel, ara rogi erepe nanu san
 34 esari nolor, ko ara marog para reviji nini niri. Ko
 san otur evi mari rege korotian, Farisi san, nisen
 Cameliel, evi jinib nevuissuisenien ne erijen ga mi
 35 mauos, ga delug jili ara rogi ni drilan; ko ni oerai
 jinib nen para van vari sopuon. Ko ni oerai e niri,
 Kami jinib ne Israel, kapa metemete suri kami, suri
 36 jinib gel niri, ko nanu ga kami kapa loli. Rege nam-
 bog uomo nen, Teudas otur evi mari, ko ni oerai ni
 evi jinib ga mi lep; ko jinib sopuon, erepe ogut
 vavij ara ebitevi: ko ara reviji pini ni; ko niri jili ga
 mara loli marogen sen ara oulu sarsar, ko ara jijici.
- 37 Mianko Judas ne Calili otur evi mari, rege nambog
 ga mara uli niser, ko ni etekai jinib sopuon ara vijuri
 ni: ko ni emij suri; ko niri jili ga mara loli marogen
 38 sen ara oulu sarsar. Ko nu nu oerai e kami, Sete
 kapa loli nanu pi san rege jinib gel niri, kapa ligeligi
 niri: pora nesopuien ser ko majigen ser pi vi nanu se
 39 jinib, mianko pi mau: pora pi vi nanu se Atua, kami
 sete kama loli uasi pu loli pi mau; nora kami kapa
 40 loli nuval rege Atua rekga. Ko niri ara marog
 erepok: ko ara verus apostol ara van keli jir, ara
 revijiri, ko ara jige niri sete para rij keli suri Iesu

41 nisen, ko ara ligeligi niri ara ivel. Ko niri ara iveligi
no korotian, ara iri suri Atua emarog niri para rogi pi
42 sij suri Nisen. Ko mu muri, rege tempel, ko lolo
aim ser, niri sete ara mosi, para vuisuiseni, ko para
rij suri Iesu, ga ni evi Kristo.

6 Rege nambog nen niri disaipel elep, niri Kris ga
mara ebitevi meri Judia, ara rij suri niri Ibru, suri
ga sete ara metemete niri rege nanen ga mara lai
2 mu muri tevi nevsevin ga diuan ser ara mij. Ko
niri esegavul dromon eru ara verus korotoni delug
ne disaipel para vini jir, ko ara oerai, Sete eres kem
namba iveligi erijen se Atua, ko namba metemete
3 nanen. Kami tuak, kapa pej rege kami, jinib pi
ambut ga mara rij me res suriri, ga mara oun saut e
Nemuin, ko nuroguasien, ko kem namba ligi niri rege
4 majigen gel. Ko kem namba lik ni terter rege
5 verusen, ko majigen ne erijen. Ko niri jili ara rogi
erijen nen eres: ko ara ligi Stifen, jinib ga mo oun
saut e nosurien ko Nemuin On, ko Filip, ko Prokoros,
ko Nikanor, ko Timon, ko Parmenas, ko Nikolas, pro-
6 selait san ne vanu Antiok: ko ara ligi rege apostol
nor: ko niri ara verus, ko ara ligi neverer reger.
7 Ko erijen se Atua uruj, evi elep; ko niri ga mara
evi disaipel ara ruj evi elep buelak rege Jerusalem;
ko jinib on niri elep ara loli nanu ne nosurien.
8 Ko Stifen, oun saut e deresen ko numalnen, ololi
9 majigen ga mi lep, ko nelelien rege delug. Ko niri
sopuon ga mara evi korotian ne Libertin, ko niri
Sairene, ko niri Aleksandria, ko niri Silisia, ko Esia,
10 ara rij tevi Stifen. Ko sete ara loli uasi para tur
11 evi mari rege nuroguasien ko Nemuin ga ni erij e. Ko
niri ara loli jinib sopuon ara cereceris, ara oerai, Kem
nama rogi ni erij erijen ga mi sij suri Moses ko suri
12 Atua. Ko ara loli nolo delug, ko buretera niri, ko
jinib ne naul ara sij suri, ko ara van jin, ko ara
13 totoni, ko ara tekai ni evan ji korotian, ko ara ligi
jinib ga mara cereceris, ko niri ara oerai, Merel sete
omosi pe rij erijen suri naim on, ko suri erijen ga mi
14 mauos; nama rogi ni oerai, Iesu do Nasaret nen pu
lokoloksi vanu gel, ko pu loli jinib sete para loli

15 nanu ga Moses elai tevi ker. Ko niri jili ga mara lik rege korotian ara meteni ni, ara lesi non erepe non agelo.

7 Ko batun jinib on oerai, Nanu gel erepok rekga?
 2 Ko ni oerai,
 Tuak niri, ko tata niri, kapa rogi. Atua ne nosuru-
 vien eremali ji tata se ker Ebram, nambog ga ni me
 lik Mesopotemia, uomo ne ni elik Haran, ko oerai e
 3 ni, Kupu veligi vanu som, ko nik niaken, ko kup vini
 4 rege vanu ga be vuisuiseni nik. Ko ni eveligi vanu
 ne Kaldea, ko elik Haran : mianko tata sen emij, Atua
 5 ololi ni elik vanu gel, ga kami kama lik e : ko sete
 elai dan sopuon evi sen regen, ejici, sete elai nutu ga
 ni pi ligi belan regen : ko ni oerai ni pi lai tevi, pi vi
 sen, ko natun ga pi vijuri ni, nambog ga ni natun san
 6 ejici. Ko Atua oerai erepel, ga ni natun para lik
 rege vanu mu nij, ko para tekai niri para loli majigen,
 7 ko para loli pi sij teviri sia pu gut pi vavij. Ko
 Atua oerai, Nu be rij suri vanu ga niri para majig
 tevi : ko pu su, niri para vini ko para loli majigen suk
 8 rege vanu gel. Ko ni elai naul ne sirkumsision tevi :
 ko Ebram evisi Aisak, ko ololi ni elalos rege nambog
 oualin, ko Aisak evisi Jakob, ko Jakob evisi Patriark
 9 esegavul dromon eru. Ko Patriark niri, ara ougasi
 10 Josef, ko ara ouloule ni evan Ijip : ko Atua elik tevi,
 ko etekai ni rege nanu ga mi sij ga mara loli ni, ko
 elai deresen tevi, ko nuroguasien rege no Fero, numal
 ne Ijip ; ko ni ololi evi Numal rege Ijip, ko rege naim
 11 sen osu. Mianko daron ga mi sij evini rege Ijip
 jili ko Kenan jili, ko niri jili ara rogi isij : ko tata
 12 se ker sete ara lesi nanen sopuon. Ko Jakob orogi
 13 korn otoi Ijip, ni okoni tata se ker, uomo nen. Ko
 ara van varu nen Josef ololi tuan niri ara rogi uasi
 14 ni ; ko Fero elesi uasi Josef niaken. Ko Josef
 okoniri para verus tata sen Jakob vini jin, ko niaken
 15 niri jili, niri gavul ambut dromon elim. Ko Jakob
 ojumbul van Ijip ; ko ni emij, ko tata se ker ara mij ;
 16 ko ara uosi niri ara van Sikem, ara ligiri rege domb
 ga Ebram ouli ji Hamor natun, rege Sikem, noulin

17 evi silver. Mianko daron ga Atua eligi uomo evini
muri, ga Atua oerai e Ebram, delug ara maur, ko
18 niri elep Ijip, ejepari nambog ga jinib san keli ga
19 sete orogi uasi Josef evi Numal Ijip. Ni ololi ceresen
tevi ker niaken, ko ololi isij tevi tata se ker, para soro-
20 tueni bibi ser suri ga sete para maur. Ko Moses ak
rege daron nen, ko ni nimben eres elep; ko ara
21 metemete ni naim se tata sen navul itul: ko ara
sorotueni, Fero natun nevsevin ouosi, ko emetemete
22 ni evi natun. Ko ara vuisuiseni Moses nuroguasien
jili se niri Ijip; ko ni eterter rege erijen sen ko
23 majigen sen. Ko ni sia sen oto muri gavul ivij,
nolon ololi ni evan, pi lesi tuan niri, Israel natun.
24 Ko elesiri ara loli isij tevi niri san, ni emetemete, ko
ebitevi meri ga mara loli mi sij tevi, ko ereviji meri
25 Ijip: ko ni ororomi tuan niri para rogi uasi Atua pi
tekai tueni niri e ni neveren; ko niri sete ara rogi
26 uasi. Mevi nen ni eremali ji nueru eru ga moro
palapal, ko ni ora pu loli nolo nueru pi sansan keli,
oerai, Numal nueru, komoro evi niaken; erepe
27 komoro loli isij tevi kamru? Ko meri ga mu loli mi
sij tevi tuan otoni ni pi vel, oerai, Isi ololi nik ku vi
28 numal ko meri ga mu loli lilani rege kem? Ku marog
kupu reviji pini inu erepe nik ku reviji pini meri Ijip
29 minivi? Ko Moses oulu suri erijen nen, ko elik rege
vanu Midian, ko evisi natun noroman eru rege vanu
30 nen. Mianko sia gavul ivij osu, agelo san eremali
jin rege meruer ne botouon Sainai, rege muro namb,
31 rege nai san. Ko Moses elesi, ni omurarog suri
nanu ga mi lesi: ko evan muri, pi lesi, Iova drilan
32 evan jin, oerai, Nu nu vi Atua se tata som, Atua se
Ebram, ko Aisak, ko Jakob. Ko Moses eririr ko
33 imdutu pi lesi. Ko Iova oerai e ni, Kupu telasi tueni
siu rege belam: nutu ga nik ku verasi evi dan on.
34 Uretun, nu nu lesi neriveravijen ne jinib suk rege
Ijip, ko nu rogi niri ara ger, ko nu jumbul, be tekai
tueni niri: ko kupu vini, bu koni nik kupu van Ijip.
35 Moses gel ga niri mara musmus, ara oerai, Isi eligi
nik ku vi numal, ko meri ga mu loli lilani? Atua
okoni ni evi numal, ko meri ga mi tekai tueni niri e

- 36 nevere agelo ga mi remali jin rege nai. Jinib nen
etekai niri, ololi majigen ga mi lep ko nelelien, rege
Ijip ko rege Dis Sogsog, ko rege meruer sia gavul
37 ivij. Ni evi Moses ga mo erai e Israel natun, Atua
pi ligi profet san se kami rege kami niaken erepe
38 inu. Ni evi meri ga me lik rege kalesia rege meruer,
tevi agelo ga me rij tevi ni rege botouon Sainai, ko
tevi tata se ker: ko ni elai erijen ne
39 mauren ga mi lai tevi ker: ko tata
se ker sete ara loli suri erijen sen, ara toni
40 ni pi vel, ko ara rieni keli, nolor evan Ijip, ara oerai
e Eron, Kupu loli demij sopuon tevi ker ga para uomo
ker: ko Moses ga mi tekai ker drama iveligi vanu
41 Ijip, drama rerelegi nanu ga mu loli ni. Ko niri ara
loli natun kau san rege nambog nen, ko ara lai nanu
ga para suli tevi aidol nen, ko ara iri suri majigen ne
42 nevere niri. Ko Atua erieni, ko elai niri para maiig
tevi nanu ne melerin; erepe ara uli naul ne profet
niri;

Kami kama lai tevi inu nanu ga kama reviji ko
kama suli.

Sia gavul ivij rege meruer rekga, O naim ne
Israel.

- 43 Ko kami kama tori naim on se Molok,
Ko moju se demij Refan.
Demij niri ga kama loli, kapa lotu e niri:
Ko nu bu uosi kami kapa van deuyjen Babilon.
- 44 Tata se ker ara tori naim on ne erijen rege meruer,
erepe ni ga me rij tevi Moses eligi, ni pu loli pi repe
45 nemuin nen ga ni elesi. Ga tata se ker ara uosi,
rege nambog ser, tevi Josua, nambog ga niri ara
lai nanu se jinib ne vanu nen, ga Atua otoni tueni
niri rege no tata se ker, ejepari nambog se Devid;
46 ga me lai deresen rege Atua non, ko emarog pu loli
47 naim se Atua se Jakob. Ko Solomon eli naim san tevi.
48 Ko meri ga drom sen Mari sete elik lolo aim ga
neverer ara loli; erepe profet oerai,
49 Melerin evi tron suk,
Ko gatan evi nai ne belak:
Iova oerai, kami kapa eli naim ga mi repe se
tevi inu?
Ko sev evi nutu ne mosien suk?

- 50 Nu neverek sete ololi nanu jili rekga?
 51 Kami ga noue kami eterter, ko nolo kami ko boro
 kami sete elalos, kama musmus Nemuin
 On mu muri: kami kama loli erepe tata se kami ara
 52 loli. Profet evis ga tata se kami sete ara loli isij
 tevi? ko ara reviji pini niri ga mara evuisuiseni uomo
 ga Meri ga mi mauos pi vini; ko leligen ok kami kama
 evi niri ga mara tekai cerasi ni, ko mara reviji pini;
 53 kami ga mara lai erijen ga mi mauos tevi kami, erepe
 agelo ara ligi, ko kami sete kama tori.
 54 Ko niri ara rogi nanu gel, ara rogi erepe nanu san
 55 esari nolor, ko ara oroliu regen. Ko ni nolon oun
 saut e Nemuin On, emeteni melerin eterter, Ko elesi
 Atua nosuruvien sen, ko Iesu otur rege Atua neveren
 56 imatu, ko oerai, Kapa lesi, nu lesi melerin etepir, ko
 57 jinib Natun otur rege Atua neveren imatu. Ko niri
 ara kail, drilar evan mari, ko ara torori orore boror,
 58 ko ara oulu regen, nolor sansan; ko ara sorotueni ni
 evan vari gaim nen, ko ara tui nevut e: ko niri ga
 mara tui ara ligi sunsun ser rege bela melakil san,
 59 nisen Sol. Ko ara tui Stifen, ko ni everus Iova, ko
 60 oerai, Numal Iesu kupu lai nemuik. Ko ni ejiba, ko
 everus, drilan evan mari, oerai, Numal sete kupu ligi
 nololien ga mi sij gel rege niri. Ni oerai nanu nen ko
 8 ematur. Ko Sol emarong ni pi mij.
 Rege nambog nen neriveravijen ga mi lep otur evi
 mari rege kalesia ga mara lik Jerúsalem; ko niri jili
 ara lik sarsar rege vanu ne Judia ko Sameria: apostol
 2 niri ara san ara lik. Ko jinib ga mara res niri ara
 3 tevini Stifen, ko ara tigsí elep. Ko Sol olokoloksi
 kalesia, esili lolo aim niri jili, ereve noroman ko
 nevsevin, ko eligi niri naim ne kaien.
 4 Ko niri ga mara lik sarsar ara ivel, ara vuisuiseni
 5 erijen. Filip ojumbul, evan vanu Sameria, evuisui-
 6 seni e niri suri Kristo. Ko delug, nolor sansan, ara
 rogi nanu ga Filip oerai e niri, ara rogi, ko ara lesi
 7 nelelien ga ni ololi. Nemuiiri ga mara sij ari vari
 rege niri elep ga mara lik reger, ara kail, drilar evan
 mari: ko niri elep ga mesien palsi ololiri, ko niri ga
 8 belar isij ara maur. Ko neiren elep rege vanu nen.
 9 Ko jinib san elik, nisen Saimon, ga mu loli botut rege
 vanu nen tui, ko ololi niri Sameria ara murarog,

- 10 oerai ni evi jinib ga mi lep san: ko niri jili ara rogi ni
 drilan, niri ga ualili, ko niri ga mara elep, ara oerai,
 Merel evi derteren se Atua, ga mara oerai Mi lep.
- 11 Niri ara rogi ni drilan, suri ga tui ni ololi niri ara
 12 murarog e botut sen. Mianko niri ara osuri Filip
 ga mi vuissuiseni erijen ga me res suri batun vanu se
 Atua, ko suri Iesu Kristo nisen, ko ara baptaisi niri,
 13 noroman sopuon, ko nevsevin sopuon. Ko Saimon,
 ni osuri: ko ara baptaisi ni, ko ni elik tevi Filip; elesi
 nelelien ko majigen ga mi lep ga mara loli, ko ni
 omurarog.
- 14 Mianko apostol niri ga mara lik Jerusalem ara rogi
 niri Sameria ara lai erijen se Atua, ara koni Piter
 15 nueru Jon oro van jir: ga moro jumbul oro van,
 16 oro verus suri, ga para lai Nemuin On: suri ga ni sete
 oer evan rege niri san: ara baptaisi niri evan rege Numal
 17 Iesu nisen. Ko ara ligi neverer reger, ko Nemuin On
 18 evan reger. Ko Saimon elesi apostol oro ligi neverer
 rege jinib niri, ko Nemuin On evan reger, ni ora pi
 19 lai mani tevi nueru, oerai, Konoro lai derteren gel tevi
 inu, meri ga be ligi neverek regen, ni pi lai Nemuin
 20 On. Piter oerai e ni, Silver som pi jijici tevi nik,
 suri ga nik ku roromi kupu lai merenien se Atua suri
 21 mani. Nanu som ejici rege nanu gel: suri ga nolom
 22 sete eres rege Atua non. Nolom pu lulului suri
 nololien ga mi sij som gel, ko kupu verus Numal, pora
 23 ni pi telasi tueni nororomien ne nolom. Nu lesi nik
 ku lik rege nanu ga mi melemel, ko nekaïen ne nanu
 24 ga mi sij. Ko Saimon erij, oerai, Kamru koporo
 verus Numal suri inu, sete nanu san ga kamru komoro
 oerai, pi vini rege inu.
- 25 Nueru oro vuissuiseni, ko oro oerai erijen se Numal,
 ko oro lui keli oro van Jerusalem, oro vuissuiseni erijen
 ga mi res tevi vanu elep ne Sameria.
- 26 Ko agelo san se Numal erij tevi Filip, oerai, Kupu
 tur evi mari, kupu van rege Saut, rege sel ga mu
 27 jumbul Jerusalem ko Cesa: nutu nen evi meruer. Ni
 otur evi mari ko evel: kupu lesi, jinib san ne Etiopia,
 evi Iunok, numalnen sen elep, rege Kandase numal
 nevsevin ne Etiopia, ni emetemetete nijor sen jili, ni
 28 evan Jerusalem, pu lotu. Ko mu lui, me lik rege
 29 jariot sen, ko evev profet Aisea. Ko Nemuin oerai e

- 30 Filip, Kupu van muri, kupu bitevi jariot gok. Ko
 31 Filip oulu evan jin, ko orogi ni evev Aisea profet, ko
 32 oerai, Ku rogi uasi nanu ga ku evev? Ko ni oerai,
 Bu rogi uasi pi repe se, pora san sete pi vuissuiseni
 32 nu? Ko ni eiari Filip pi sa, ko pi sakel tevi. Ko nutu
 ne naul on ga mi evev evi nanu gel,
 Ara tekai ni erepe sio ga pi van rege mijen;
 Erepe lam, epereper rege no meri ga mi tevei tueni
 silivin,
 Ni erepok, sete euag:
 33 Nambog ga mu rogi mi sij, ara lai tueni erijen ga
 mi mauos sen:
 Ko isi pe rij suri dulu sen?
 Suri ga mara lai tueni mauren sen iel gatan.
 34 Iunok erij keli tevi Filip, oerai, Nu susi nik, profet
 erij nanu gel suri si? suri ni, rekga suri jinib mu nij.
 35 Ko Filip erij tevi, evuissuiseni ni suri Iesu, rege naul
 36 on nen uomo. Ko nueru oro ivel suri sel seru, oro
 van ji nui san; ko Iunok oerai, Kupu lesi, nui gel;
 38 sev ejige nik kupu baptaisi nu? Ko ni oerai jariot
 pu tur: ko nueru oro jumbul van rege nui nen, Filip
 39 nueru Iunok; ko ebaptaisi ni. Ko nueru oro togsa
 rege nui, Nemuin se Numal ouosi tueni Filip; ko
 40 Iunok sete elesi keli, ko ni evel suri sel sen, eiri. Ko
 ara lesi Filip rege Asotas: ko ni asi, ko evuissuiseni
 erijen ga me res rege vanu jili, mianko ejepari
 Sesaria.

- 9 Ko Sol, erij lolaren ko mijen rege disaipel niri se
 2 Numal, evan ji batun jinib on, ko ogoni naul ga ni pu
 tori pi van Damaskus, tevi naim ne lotuen niri, pora ni
 pi lesi jinib sopuon ne Sel nen, pora noroman rekga
 nevsevin, ni pi kai totoni niri, ko pi tekairi para van
 3 Jerusalem. Ni evel, mianko evini muri Damaskus:
 4 gavilivil muron ne melerin san oror ererali ni: Ni
 ouajeni van gatan, ko orogi drilan san oerai e ni, Sol,
 5 Sol, erepe nik ku reviji nu? Ko ni oerai, Nik ku vi si,
 Numal? Ko ni oerai, Nu vi Iesu, ga nik ku reviji:
 6 Kupu tur evi mari, kupu van gaim nen, ko para oerai
 7 e nik nanu ga kupu loli. Ko niri ga mara ivel tevi,
 ara tur, ara pereper, ara rogi drilan, ko sete ara, lesi

8 jinib san. Ko Sol emera ligi dan ; ko meten okulu,
 sete elesi nanu san ; ko ara totoni neveren, ara tekai
 9 ni, ko ara ebitevi ni evan Damaskus. Ko ni elik nam-
 bog itul, sete okulu, ko sete aan, ko sete eminemin.
 10 Ko disaipel san elik Damaskus, nisen Ananaias ; ko
 Numal oerai e ni, ga ni ematur, Ananaias. Ko ni oerai,
 11 Kupu lesi, Inu le gel, Numal. Ko Numal oerai e ni,
 Kupu tur evi mari, kup van rege sel ga nisen Mimauros,
 ko kupu van naim se Judas, kupu susi san nisen Sol,
 12 jinib ne Tarsus : kupu lesi, ni everus ; ko elesi jinib
 san nisen Ananaias evini, ko eligi neveren regen, pu
 13 loli ni pu kulu keli. Ananaias oerai, Numal, nu rogi
 niri elep ara rij suri meri nen, nanu ga mi sij elep
 14 ga ni ololi tevi jinib ga mara res som, Jerusalem : ko
 ni evini iel otori numalnen ji batun jinib on niri, ga ni
 15 pi kai totoni niri jili ga mara verus suri nisem. Ko
 Numal oerai e ni, Kupu ivel suri sel som : nu ligi ni pi
 vi biles ga me res suk, pi lai nisek pi van rege no Jen-
 16 tail niri, ko numal niri, ko Israel natun niri : ko bu
 loli ni pu rogi uasi nanu ga mi sij pi lep ga ni pu
 17 rogi pi sij suri nu nisek. Ananaias evel, ko esili lolo
 aim nen ; ko eligi neveren regen, oerai, Tuak Sol,
 Numal, evi Iesu, ga mi remali jim rege sel ga nik ku
 vini ,okoni nu, ga nik kupu kulu keli pi res, ko nolom
 18 pu oun saut e Nemuin On. Ko gavalivil nanu sopuon
 ara evitan rege meten, erepe bereten, ko ni okulu eres ;
 19 ko ni otur evi mari, ko ara baptaisi ni ; ko ni aan ko
 nimben eterter keli.

Ko ni elik nambog sopuon tevi disaipel niri ga mara
 20 lik Damaskus. Ko gavalivil, rege naim ne lotuen, ni
 21 evuisuiseni, ga Iesu, ni evi Atua natun. Ko niri jili
 ga mara rogi, ara murarog, ara oerai, Ni sete evi meri
 ga mu lokoloksi rege Jerusalem, niri ga mara verus
 suri nisen gel rekga? ko ni evini iel suri nanu nen, pi
 kai totoni, ko pi tekai niri para van rege no batun jinib
 22 on niri. Ko Sol derteren sen uruj evi elep, ko ni
 ololi Ju niri ga mara lik Damaskus sete ara rij, ololi
 niri ara rogi uasi, meri nen evi Kristo.

23 Mianko nambog elep osu, Ju niri ara sopue para
 24 reviji pini : Ko Sol orogi nesopuien ser. Ko niri ara
 metemete metali natamerin ko natamupog, para

- 25 reviji pini ni: Ko jinib sen ara tekai ni natamupog,
ko ara jumbuli ni rege nauor nen, rege nara san.
- 26 Mianko ni evan Jerusalem, ora pi bitevi disaipel niri;
ko niri jili ara medutu e ni, sete ara osuri ni evi
- 27 disaipel. Ko Barnabas ebitevi ni, ko etakai evan ji
apostol niri, ko oerai niri ni elesi Numal rege sel, ko
Numal erij tevi, ko ni evuisuiseni rege Damaskus suri
- 28 Iesu nisen, metuen ejici. Ko ni ebitevi niri, evini ko
29 evel rege Jerusalem, evuisuiseni suri Iesu nisen,
metuen ejici: ko ni erij, ko osopue rege niri Cris ga
- 30 mara evi Ju; ko oto muri para reviji pini. Mianko
tua niri ara rogi, ara tekai ni ojumbul van Sesaria, ko
okoni ni evan Tarsus.
- 31 Ko demat oto rege kalesia rege Judia ko Calili,
ko Sameria jili, ko niri ara maur eres; ara ivel rege
metuen se Iova, ko nororomien se Nemuin On, ko niri
elep ara vini jir.
- 32 Ko eremali erepok, Piter evan rege vanu jili, ko
ojumbul evan ji jinib ga mara res ga mara lik Lida.
- 33 Ko elesi rege vanu nen jinib san nisen Eneas, ga mi
matur rege malig sen sia ouil; suri ga mesien palsi
- 34 ololi. Piter oerai e ni, Eneas, Iesu Kristo ololi nik
35 ku maur: kupu mera, kupu loli lilani malig som. Ko
ni emera gavlivil. Ko niri jili ga mara lik Lida ko
Saron ara elesi ni, ko ara rieni van ji Numal.
- 36 Ko disaipel san elik Jopa, nisen Tabita, nevuisui-
senien nen evi Dorkas: vinen ololi majigen ga mara
- 37 res, ko merenien elep mu muri. Mianko rege nam-
bog nen ni emsi, ko emijepa: ko ara jivili ni, ko ara
- 38 ligi lolo aim san ga mu to mari. Ko Lida oto muri
Jopa: disaipel niri ara rogi Piter elik Jopa, ara koni
jinib eru van jin, ara eiari ni, ara oerai, Sete kupu
- 39 lolola kupu vini ji kem. Piter otur evi mari ko evan
ji nueru. Ko evan jir, ara tekai ni van lolo aim ga
mu to mari: ko nevsevin niri ga diuan ser ara mij
ligi ara tur muri, ara tigsi, ko ara loli ni elesi sunsun
- 40 elep ga Dorkas ololi, nambog ga ni me lik jir. Piter
ololi niri jili ara van vari, ko ni ejiba, ko everus; ko
erieni van ji ni ga mi mij, oerai, Tabita, kupu mera.
- 41 Ko ni okulu; ko elesi Piter, ni elik ramos. Ni oroto-
toni neveren, ko esai eraji; ko everus jinib ga mara
res niri, ko nevsevin ga diuan ser ara mij ligi, elai

42 ni tevi niri, emaur. Ko niri ara rogi rege Jopa osu :
 43 ko niri elep ara osuri Numal. Ko ni elik Jopa nam-
 bog elep, elik ji jinib san nisen Saimon, ni evi taner.

10 Ko jinib san elik Sesaria, nisen Kornelius, ni evi
 senturion ne melig jinib nuval, ga me vi melig ne Itali,
 2 evi jinib ga me res, meri ga mi medutu Atua, tevi
 naim sen niri jili, ni elai merenien elep tevi jinib, ko
 3 everus Atua mu muri. Ni ematur lesi, oto elimijer,
 rege aur esuan ne nambog, agelo se Atua san evini
 4 jin, ko oerai e ni Kornelius. Ko ni, emeteni ni
 eterter, ko imdutu, oerai, Sev ko? Numal. Ko
 oerai e ni, Verusen som, ko merenien som ara van
 5 mari, ololi Atua ororomi nik. Ko leligen ok kupu
 koni jinib sopuon para van Jopa, para tekai Saimon
 6 vini, ko ni nisen san keli Piter : ni elik naim se jinib
 san nisen Saimon, ni evi taner, naim sen oto galu.
 7 Ko agelo ga me rij tevi, evel, ni everus jinib eru ga
 moro majigen naim sen, ko jinib nuval ga me res
 8 san ga mi bitevi ni mu muri; ko oerai e niri nanu
 jili, okoniri para van Jopa.
 9 Niri ara ivel suri sel ser, ko mevi nen, ga mara
 van muri vanu nen, Piter esa evan mari ne naim, pi
 10 verus, evi aur esuan : ko numer aji ni, ko emarog pi
 11 aan : ko niri ara loli lilani, ni ematur; ko elesi melerin
 etepir, ko biles san evini gatan, erepe kalik ga mi lep
 san, ga mara tori bogsen ivij, ko ara jumbuli van
 12 gatan : ko nanu jili ga belar ivij ara to regen, ko
 nanu ga mara era rege dan, ko numun ne melerin niri.
 13 Ko drilan san evan jin, oerai, Kupu tur evi mari,
 14 Piter; kupu reviji, ko kupu roi. Piter oerai, Sete
 pi repok, Numal; nu sete nu roi nanu san isij, ko sete
 15 ouokuok. Ko drilan evan keli jin varu nen, oerai,
 Nanu ga Atua ololi ouokuok, nik sete kupu oerai isij.
 16 Ko ara loli nanu nen vatul : ko ara lai keli biles nen
 evan rege melerin gavilivil.
 17 Ko Piter ererelegi olon, ko ororomi elep suri nanu ga
 mi matur lesi evi sev, kapa lesi, jinib niri ga Kornelius
 okoniri, ara tur rege metali, ara susi rege sel naim
 18 se Saimon, ko ara verus, ko ara susi ga Saimon ga
 19 nisen keli Piter, elik regen. Ko Piter ororomi vani
 nanu ga mi matur lesi, Nemuin oerai e ni, Kupu lesi,

20 jinib itul ara epej e nik. Kupu tur evi mari, ko
 kupu jumbul, ko kupu iel tevi niri, metuen by jici:
 21 suri ga nu nu koni niri. Ko Piter ojumbul, evan ji
 jinib nen niri, ko oerai, Kapa lesi, nu nu vi meri
 ga kami kama pej: sev evi nanu ga kami kama vini
 22 suri? Ko niri ara oerai, Kornelius, Senturion san,
 jinib ga me res, ga mi medutu Atua, ko niri jili ne
 vanu Judia ara rij eres suri, ko Atua okoni agelo on
 san evan jin pu oerai e ni, nik kupu vini ji naim sen,
 23 ni pu rogi erijen som sopuon. Ko ni oerai niri para
 van lolo aim, ko eligi niri para matur.

Mevi nen, ni emera, ko evel tevi niri, ko niri
 24 kalesia sopuon ne Jopa ara ebitevi. Ko mevi keli
 ara sili ara van Sesaria. Ko Kornelius elik terai
 niri, tevi niaken niri, ko selen niri ga ni everus koro-
 25 toniri. Ko eremali erepok: Piter esili, Kornelius
 26 eseu it e ni, ko ouajeni rege belan, olutu e ni. Ko
 Piter ololi ni otur evi mari, oerai, kupu tur evi mari:
 27 nu nu vi jinib erepe nik. Ko erij tevi, ko evan lolo
 28 aim, ko elesi niri elep ara lik koroti. Ko ni oerai e
 niri, Kami kama rogi uasi evi nanu ga sete emaus
 jinib ga me vi Ju pi bitevi jinib ne vanu mu nij, ko
 pi van jin; ko Atua ololi nu nu rogi uasi nu sete bu
 29 oerai jinib pi san ni isij, ko sete ouokuok: suri nanu
 gel nu nu vini, sete nu musmus, ga nik ku oerai be
 vini. Suri nanu nen nu susi e kami, erepe kama
 30 oerai nu be vini. Ko Kornelius oerai, Bogen ivij
 ejepari aur gel, nu nu lik lolo aim suk rege aur esuan;
 ko kupu lesi, jinib san otur rege nok, sunsun sen
 31 oeraperap, ko oerai, Kornelius, ara rogi verusen som,
 ko Atua ororomi merenien ga nik ku loli rege non.
 32 Kupu koni jinib sopuon para van Jona, para verus
 Saimon, ga nisen keli Piter; ni elik lolo aim se
 33 Saimon, ga me vi taner, galu. Ko nu koniri ara
 van jim gavilivil; ko nik ku loli eres, ku vini. Ko
 ker jili drama lik iel rege Atua non, kem namba rogi
 34 nanu jili ga Numal oerai e nik. Ko Piter erij tevi
 oerai,

Uretun nu rogi uasi Atua sete emereni nimbe jinib:
 35 rege batun vanu jili meri ga mi medutu e ni, ko ololi

36 nololien ga mi mauos, ni eres rege non. Erijen ga
 ni elai tevi niri Israel, ga Iesu evuisuiseni erijen ga
 37 me res ne demat (ni evi Numal se niri jili)—kami kama
 rogi uasi erijen nen, ga mara oerai rege Judia jili,
 rege Calili uomo, evitu ne baptaisien ga Jon evuisui-
 38 sen; evi Iesu do Nasarat ga Atua evaseni ni e
 Nemuin On ko derteren: ko ni evel ko ololi majigen
 ga me res, ko niri jili ga diablo ara lokoloksiri, ni
 39 ololiri ara maur; suri ga Atua ebitevi niri. Ko kem
 nama evi jinib noeraien rege nanu jili ga ni ololi rege
 vanu ne Ju, ko rege Jerusalem, ko niri ara reviji
 40 pini, ara rOLONI rege nai san. Ko Atua ololi ni
 otur evi mari rege nambog itulin, ko eligi ni elik
 41 elimijer, sete rege delug jili, rege jinib noeraien ga
 Atua otombotombo uomo, evi kem, ga nama aan ko
 nama minemin tevi, evitu ga ni otur evi mari ligi mijen.
 42 Ko ni oerai e kem namba vuissuiseni delug, ko namba
 oerai ni evi meri ga Atua eligi pi vi Jaj se niri ga mara
 43 maur ko niri ga mara mij. Profet niri jili ara rij
 suri ni, niri jili ga mara osuri ni, para lai netelasien
 ne nololien ga mi sij ser suri ni nisen.
 44 Ko Piter erij vani erijen nen, Nemuin On evan rege
 45 niri jili ga mara rogi erijen. Ko niri ne nelalosen
 ga mara osuri, niri jili ga mara ebitevi Piter vini,
 ara murarog, suri ga mara jive merenien se Nemuin
 46 On rege Jentail niri. Ko ara rogi niri ara rij, nemer
 47 mu mij, ko ara suruvi Atua. Ko Piter oerai, Jinib
 san pi jige nui rekga? sete para baptaisi niri, niri ga
 48 mara lai Nemuin On erepe ker? Ko ni oerai para
 baptaisi niri suri Iesu Kristo nisen. Ko niri ara iari
 ni pi lik nambog sopuon.

11 Mianko apostol niri ko kalesia niri ga mara lik
 Judia ara rogi Jentail niri ara lai erijen se Atua.
 2 Mianko Piter otogsa evan Jerusalem, niri ne nelalosen
 3 ara tori ni, ara oerai, Nik ku van ji jinib niri ga
 4 nelalosen ejici, ko nik ku aan tevi niri. Ko Piter
 5 erij, evuisuiseni emauos nanu nen tevir, oerai, Nu nu
 lik rege vanu Jopa, nu verus: ko nu matur lesi; nu
 lesi biles san evini gatan erepe kalik ga mi lep san
 ara tori bogsen nen ivij, ko ara jumbuli rege melerin

- 6 vini; ko evini jik: ko nu meteni eterter, ko nu
 7 roromi, ko nu lesi nanu ne gatan ga belar ivij, ko
 8 nanu rum niri, ko nanu ga mara era rege dan, ko
 9 numun ne melerin. Ko nu rogi drilan san oerai e nu,
 10 kupu tur evi mari Piter; kupu reviji, ko kupu roi. Ko
 11 nu oerai, Sete pi repok, Numal: nanu san
 12 isij, ko nanu san sete ouokuok, sete oer
 13 evan rege jigok. Ko drilan evel keli
 14 rege melerin vini, varu nen, oerai, Nanu ga Atua ololi
 15 ouokuok, nik sete kupu oerai isij. Ko ara loli nanu
 16 nen vatul: ko ara uosi keli evan jili rege melerin. Ko
 17 kapa lesi, gavilivil jinib itul ara tur rege no naim ga
 18 kem nama lik e, niri ga mara koniri Sesaria vini jik.
 19 Ko Nemuin okoni nu be van jir, sete bu oerai niri ara
 20 evi jinib mu nij. Ko kalesia niri ouon gel ara ebitevi
 21 nu; ko kem nama sili lolo aim se meri nen: Ko ni
 22 oerai e kem erepe ni elesi agelo otur lolo aim sen, ko
 23 oerai, Kupu koni jinib sopuon para van Jopa, ko para
 24 tekai Saimon ga nisen keli Piter, vini; ko ni pe rij
 25 erijen sopuon tevim, ga nik kupu maur suri, nik ko
 26 naim som niri jili. Ko nu nu rij sopuon teviri, ko
 27 Nemuin On evan reger, erepe evan rege ker rege
 28 nambog uomo nen. Ko nu roromi erijen se Numal,
 29 ga ni oerai, Jon baptaisi e nui; ko para baptaisi kami
 30 e Nemuin On. Pora Atua elai merenien tevi niri,
 31 orsorsan ga mi lai tevi ker, nambog ga ker drama
 32 osuri Numal Iesu Kristo, nu nu vi si, be jige Atua.
 33 Ko ara rogi nanu gel niri, ara pereper, ko ara suruvi
 34 Atua, ara oerai, Ko Atua elai netelasien ga me vi
 35 mauren tevi Jentail niri.
 36 Ko niri sopuon ga mara oulu sarsar suri nerivera-
 37 vijen ga mu tur evi mari suri Stifen ara van gasu,
 38 ara van Fenisia ko Saiprus, ko Antiok, ara rij erijen
 39 nen tevi niri Ju ara san. Ko niri sopuon, jinib ne
 40 Saiprus, ko Sairini, ga mara van Antiok, ko ara rij
 41 tevi niri Kris, ara vuisuiseniri e Numal Iesu. Ko
 42 Numal neveren ebitevi niri: ko niri elep ga mara
 43 osuri ara rieni van ji Numal. Ko drilan suri niri
 44 evan rege boro kalesia ne Jerusalem: ko ara koni
 45 Barnabas pi an Antiok: ko ni evan, ko elesi Atua
 46 deresen, ko eiri; ko eiari niri jili, rege maro-
 47 gen ne nolor niri para mbuliji Numal pi

24 terter: ni evi jinib ga me res, nolon oun
 saut e Nemuin On, ko nosurien: ko niri
 25 elep ara vini ji Numal. Ko ni evan Tarsus, pi pej
 26 Sol: ko elesi, etekai ni evan Antiok. Ko eremali
 erepel, rege sia san osu, niri ara lik koroti tevi
 Kalesia niri, ko ara vuissuiseni delug elep; ko rege
 Antiok uomo, ara oerai disaipel niri ara evi Kristian.
 27 Rege nambog nen, profet niri sopuon, ara jumbuli
 28 Jerusalem, ara van Antiok. Ko niri san, nisen
 Akabus otur evi mari, Nemuin ololi ni oerai daron ga mi
 sij ga mi lep, pi van rege vanu jili: ko eremali rege
 29 nambog ne Klodius. Ko disaipel, niri jili erepe ni
 ololi uasi, ara ororomi para lai merenien tevi tuan
 30 niri ga mara lik Judia: ko ara loli, ara lai tevi Bar-
 nabas nueru Sol, pora lai tevi buretera niri.

12 Rege daron nen, Herod Numal, esarini neveren,
 2 pu lokoloksi niri sopuon ga mara evi kalesia. Ko
 3 ereviji pini Jems, Jon tuan, nesip nuval e. Ko elesi
 Ju niri ara rogi eres suri, ni evan pu rototoni Piter
 pu to tevi. Evi nambog ga bred ga leven ejici regen.
 4 Ko elai ni, ekai rege naim ne kaien, elai tevi jinib
 nuval esegavul dromon ouon para metemete ni; nam-
 bog ne Asien pi asi ni emarog pi tekai ni vini, pi lai
 5 tevi delug niri. Suri nanu nen ara tori Piter naim
 ne kaien: ko kalesia niri ara verus eterter tevi Atua
 6 suri. Ko nambog ga Herod ora ni tekai ni vini, nata
 mupog nen, Piter ematur livu jinib nuval eru, ara kai
 totoni ni dil nevut eru: ko jinib sopuon ara tur rege
 7 metali ara metemete naim ne kaien. Ko kapa lesi,
 agelo san se Numal otur tevi, ko nasul san oror lolo
 aim nen: ko ni ereviji Piter nelin, ko oni, oerai,
 Kupu tur evi mari pigavil. Ko dil nevut evitan
 8 ligi neveren. Ko agelo oerai e ni, Kupu tatu, ko
 kupu malji totoni sandal som. Ko ni ololi. Ko
 oerai e ni, Kupu uri sunsun ga mi lep som, ko kupu
 9 vijuri nu. Ko ni evan vari, evijuri; ko ni ererelegi
 nanu ga agelo ololi evi uretunen, ororomi ni ematur
 10 lesi nanu san. Ko nueru oro asi melig jinib nuval
 uomo nen, ko eruan, ko oro van ji metali ga mevi
 delrur, ga mara sili para van gaim regen; ko ni etepir

- tevi, erepe marogen sen: ko nueru oro van vari, ko oro ivel rurugi sel san; ko agelo eveligi ni gavilivil.
- 11 Mianko Piter ororomi eres, oerai, Leligen ok, nu rogi uasi uretun, Numal okoni agelo sen, etekai tueni nu rege nevere Herod, ko rege marogen se jinib Judia
- 12 niri. Ko ni ororomi sopuon, ko evan naim se Meri, tasu se Jon ga nisen san keli evi Marik; niri elep ara
- 13 lik koroti regen, ara verus. Ni otuti metali vari nen,
- 14 nevsevin melakel san, nisen Roda, evan pu susi. Ko ni orogi uasi Piter drilan, sete etasi metali, suri neiren,
- 15 oulu keli lolo aim, oerai Piter otur rege metali. Ko niri ara oerai e ni, Nik ku legeleg. Ko ni erij eterter, oerai evi ni. Ko ara oerai, Evi agelo sen.
- 16 Ko Piter otuti vani: mianko ara tasi metali, ara lesi,
- 17 ko ara murarog. Ko ni euereleni niri e neveren, niri para pereper, oerai e niri erepe Numal etakai ni pi veligi naim ne kaien. Ko ni oerai, Kapa oerai e nanu gel e Jems ko tuak niri. Ko ni evel, evan vanu
- 18 mu nij. Mianko natamerin, jinib nuval niri ara rij
- 19 elep suri nanu ga mu loli Piter. Mianko Herod epej e ni, ko sete elesi, ni osusi niri ga mara metemete, ko oerai para reviji piniri suri. Ko ni ojumbuli ligi Judia, evan Sesaria, ko êlik nutu nen.
- 20 Ko ni orogi isij elep suri niri Tair ko Saidon: ko niri ara van jin nolor sansan, ko ara loli Blastus, meri ga mi metemete lolo aim ga numal mi matur regen, evi seler, ko ara ogoni demat, suri vanu ser elai nanen
- 21 rege vanu se numal. Rege nambog san ga mara ligi uomo, Herod ori sunsun ga me res se numal, ko
- 22 esakel rege tron sen, ko erij eres tevi niri. Ko delug niri ara kail, ara oerai, Drila Atua san, jinib
- 23 ejici. Ko agelo se Atua ereviji gavilivil, suri ga ni sete elai nosuruvien tevi Atua: ko naul ara roi ni, ko nemuin eveligi.
- 24 Ko erijen se Atua uruj ko emaur elep. Ko Bar-
- 25 nabas nueru Sol oro lui keli oro iveliŕi Jerusalem, oro loli jili majigen seru, ko oro tekai Jon, ga nisen san keli Marik, ebitevi nueru.

- 13 Rege kalesia Antiok profet sopuon, ko jinib nevui-
suisenien sopuon ara lik; Barnabas, ko Simion ga
nisen keli Naicer, ko Lusius do Sairene, ko Manaen,
2 Herod titrak tuan, ko Sol. Ko ara loli majigen se
Numal, ko ara vil, Nemuin On oerai, Kapa ligi vini jik
Barnabas nueru Sol poro loli majigen ga nu nu oerai
3 nueru poro loli. Niri ara vil, ko ara verus suri, ko
ara ligi neverer rege nueru, ko ara konuero oro ivel.
4 Ko nueru ga Nemuin On okoni nueru, oro jumbuli
oro van Selusia; ko oro iveligi, oro sa rege drav san,
5 oro van Saiprus. Rege Salamis nueru oro vuvisueni
erijen se Atua lolo aim ne lotuen se Ju niri: ko Jon
6 ebitevi nueru. Ko ara van rege nurur nen osu, ara
van Pafos, ko ara lesi jinib san ga mu loli botut, evi
7 profet ne ceresen, evi Ju, nisen Bar-jesus; ni elik tevi
pro-konsul Serjius Polus, ni evi jinib ga mu rogi uasi.
Ni everus Barnabas nueru Sol poro van jin, ko epej
8 pu rogi erijen se Atua. Ko Elimas ga mu loli botut
(ni nisen keli erepok) otori nueru, ora pu loli pro-
9 konsul pi rieni ligi nosurien. Sol, nisen keli evi
10 Pol, oun saut e Nemuin On, emeteni ni eterter, ko
oerai, O, meri ga mo oun saut e ceresen, ko nololien
ga mi sij jili, nik ga ku ougasi nololien ga mi mauos
jili, nik sete kupu mosi rekga, kupu erieni sel ga mi
11 mauos se Iova? Ko kupu lesi, Iova neveren oto rege
nik, metem pu ror, sete kupu lesi nial daron sopuon.
Ko nanu san evan regen gavilivil erepe meten pu
mbumbuj, evi natomot; ko ni evan epej san pu
12 rototoni neveren, ko ni tekai ni. Ko pro-konsul elesi
nanu ga mara loli, ni osuri, omurarog suri nevuisui-
senien se Numal.
- 13 Ko Pol, tevi niri ga mara ebitevi ni, ara iveliŕi Pafos
ara oulu nambin, ko ara van Perca, rege Pamfilia:
14 ko Jon oro iveligi nueru, olui evan Jerusalem. Ko
nueru oro ivel Perca, oro van Antiok ne Pisidia; ko
15 oro van naim ne lotuen rege Sabat, ko oro lik. Niri
ara evev erijen ga mi mauos, ko erijen ne profet niri,
jinib on niri ne naim ne lotuen osusi e nueru, ara
oerai, Tuak niri, pora kama tori erijen neiarien
16 sopuon ga kapa lai tevi delug, kapa oerai. Ko Pol
otur evi mari, ko oluv e neveren, oerai.
Kami jinib ne Israel, ko kami ga kama medutu

- 17 Atua, kapa rogi. Atua se jinib gel, niri Israel,
ototombotombo e tata se ker, ko ololi jinib nen ara
van mari, daron ga niri ara lik vanu Ijip, ko esarini
neveren evan mari, ko etekai niri ara iveligi vanu
18 nen. Ko ni orogi nololien ser rege meruer, erepe sia
19 gavul ivij. Mianko ni olololoksi jinib ne vanu ambut
rege vanu ne Kenan, ko elai vanu ser tevi niri, pi vi
ser, ko erepok erepe sia ogut vavij bulin gavul elim :
20 ko nanu nen osu ni elai jaj tevi niri, ejepari Samuel
21 profet. Mianko niri ara ogoni kig san: ko Atua
elai Sol, Kis natun teviri, evi jinib ne Benjamin niaken,
22 ko erepok sia gavul ivij. Mianko elai tueni ni, eligi
Devid pi vi kig ser; ko erij suri ni, oerai, nu lesi
Devid, Jese natun, evi jinib erepe nu nolak, ni pu loli
23 jili marogen suk. Rege jinib nen niaken, Atua elai
tevi niri Israel, Savior san, Iesu, erepe ni oerai e niri
24 uomo; ko ni sete euor evini, Jon evuisuiseni delug
25 jili ne Israel baptaisien ne nolor para lulului. Ko
Jon ololi majigen sen, ni oerai, Kami kama roromi nu
nu vi si? Nu sete nu vi ni. Kapa lesi san pi vini,
pi vijuri nu, nu sete nu res be telasi nases ne siu sen.
26 Tuak niri, kami Ebram natun, ko kami jili ga kama
medutu Atua, ara koni erijen ne netelasien evini ji
27 ker. Niri ga mara lik Jerusalem, ko jinib on ser,
sete ara rogi uasi ni, ko sete ara rogi uasi erijen ne
profet ga mara evev mu muri rege Sabat, ara rij isij
28 suri ni, ko ara loli erijen nen suri. Niri sete ara lesi
nanu ga ni pi mij suri, ko ara ogoni Paillet pi reviji
29 pini. Mianko ara loli jili nanu ga mara uli suri, ara
30 lai tueni ni rege nai, ko ara ligi rege domb san. Ko
31 Atua ololi ni otur evi mari ligi niri ga mara mij. Ko
niri ga mara togsa ligi Calili, mara van Jerusalem
tevi, ara lesi ni nambog elep, ko niri ara evi jinib
32 noeraien sen tevi delug. Kem nama lai tevi kami
erijen ga me res ne nanu ga ni oerai e tata se ker,
33 ga Atua ololi tevi natu ker, suri ga ni ololi Iesu otur
evi mari; erepe ara uli rege Sam eruan, Nik ku vi
34 natuk, nu visi nik leligen. Suri nanu, ga ni ololi ni
otur evi mari ligi niri ga mara mij, ko sete pu lui
keli pi van rege nanu ga mu mutumut, ni erij erepok:
Nu be lai tevi nik deresen on ko uretun se Devid.

- 35 Rege Sam san keli ni oerai, Nik sete kupu ligi Jinib
 36 On som pi lesi nanu ga mu mutumut. Ko Devid,
 ni ololi jili erijen se Atua rege dulu sen, ko ematur,
 ko ara ligi ni tevi tata sen niri, ko ni elesi nanu ga
 37 mu mutumut: ko meri ga Atua ololi otur evi mari sete
 38 elesi nanu ga mu mutumut. Suri nanu gel, tuak
 niri, kapa rogi uasi, ara vuissuiseni kami netelasien ne
 39 nololien ga mi sij suri jinib gel: suri ni, niri jili ga
 mara osuri, ara telasi meri nen rege nanu jili, erijen
 40 lilani se Moses sete ololi uasi pi telasi ni. Kapa
 metemete suri, pora nanu ga profet niri ara oerai pi
 vini rege kami, evi nanu gel:
- 41 Kapa lesi, kami ga kama musmus, ko kapa mura-
 rog, ko kapa jijici;
 Nu nu loli majigen san rege nambog se kami.
 Majigen san ga kami sete kapa osuri, pora san pu
 oerai e kami.
- 42 Mianko ari vari, ara iari para oerai keli erijen nen
 43 teviri rege Sabat pi san keli. Mianko niri jili ara
 iveligi naim ne lotuen, Ju niri elep, ko proselait ga
 mara res niri elep, ara evijuri Pol nueru Barnabas: ko
 nueru oro rij teviri, oro iariri para lik pi terter rege
 Atua deresen.
- 44 Mianko Sabat evini keli, niri jinib ne vanu nen oto
 muri pu su ara lik koroti, para rogi erijen se Atua.
 45 Ko Ju niri ara lesi delug, nolor ara oun saut e lolaren,
 46 ko ara rij suri nanu ga Pol oerai, ko ara rij isij. Pol
 nueru Barnabas oro rij elimijer, sete oro medutu, oro
 oerai, Eres namba oerai erijen se Atua tevi kami pu
 uomo. Suri ga kami kama toni tueni, ko sete kama
 roromi eres rege kami kapa lai mauren ga mu to
 tui gok vini, kapa lesi, kem nama rieni van ji Jentail
 47 niri. Suri ga Numal oerai e kem erepok, oerai.
 Nu ligi nik ku vi muro nasul se Jentail niri,
 Nik kupu vi mauren pi van bogbogsen ne vanu.
- 48 Ko Jentail niri ara rogi nanu nen, niri ara iri suri, ko
 ara suruvi erijen se Atua: ko niri jili ga mara ligiri
 para lai mauren ga mu to tui gok vini, ara osuri.
 49 Ko erijen se Atua evan rege vanu nen osusu. Ko Ju
 50 niri ara rij tevi nevsevin ga mara res sopuon, niri ga
 mara evi nevsevin ga mara rogi drilar, ko niri ga mara

evi numal sopuon, ko ara loli neriveravijen rege Pol
 nueru Barnabas, ko ara sorotueni nueru rege vanu
 51 ser. Ko nueru oro teuasi tueni mau rege belar suri
 52 niri, ko oro van Ikonium. Ko disaipel niri ara oun
 saut e neiren ko Nemuin On.

- 14 Mianko eremali erepel Ikonium, nueru oro sili naim
 ne lotuen se Ju niri, ko oro rij: erijen seru ololi delug
 2 elep ara osuri, Ju niri ko Jentail niri. Ko Ju niri
 ga sete ara loli erijen, ara loli nolo niri Jentail ara
 3 karakar, ko ara loli niri ara ougasi kalesia niri. Ko
 nueru oro lik vanu nen nambog elep, metuen seru
 ejici, ko oro rij suri Numal, ko ni ebitevi erijen deresen
 sen, ko ololi nevere nueru oro loli nelelien ko majigen
 4 ga mara elep. Ko delug ne vanu nen ara evi melig
 eru; sopuon ara ebitevi Ju niri, ko sopuon ara ebitevi
 5 apostol niri. Ko Jentail niri, ko Ju niri, tevi numal
 ser, ara oulu rege niri, para loli pi sij teviri, ko para
 6 tui niri, ko niri ara rogi uasi, ko ara oulu van rege
 vanu ne Likaonia, ko Listra, ko Derbe, ko vanu ga
 7 mi rerai gaim nen: ko niri ara vuissiseni erijen ga me
 res rege vanu nen niri.
- 8 Rege Listra, jinib san elik, ni belan emijemij, evi
 naroj, sete evel, nambog ga tasu sen evisi, ejepari
 9 nambog nen. Meri nen orogi Pol erij: ko Pol emeteni
 10 ni, ko elesi ni nosurien sen otoi, ni pi maur, erij, drilan
 11 evan mari, oerai, Kupu tur evi mari rege belam. Ko
 ni orau vi mari, ko evel. Ko delug ara lesi nanu ga
 Pol ololi, drila niri evan mari, ara oerai erijen
 Likaonia, atua niri ara jumbul vini ji ker, rege nimbe
 12 jinib. Ko ara ligi Barnabas, nisen Jupiter, ko Pol,
 13 Merkuri, suri ga ni evi meri ga me rij. Ko jinib on
 se Jupiter, ga naim on sen oto rege no ne vanu nen,
 elai okis sopuon, ko nevugun sopuon van rege metali,
 14 ni, ko delug niri para suli tevi nueru. Ko apostol
 nueru, Barnabas ko Pol, oro rogi, nueru oro reresi
 sunsun seru, ko oro oulu van rege delug, ora verus,
 ko oro oerai, Numal niri, erepe kana loli nanu gel?
 15 Komru nomor evi jinib, nororomien se komru ko kami
 orsorsan, ko nomoro lai erijen ga me res tevi kami,
 ga kami kapa rieni ligi nanu naun gel, van ji Atua

- ga mi maur, ga mu loli melerin, ko gatan, ko dis, ko nanu ga mo su gok ga mara to reger:
- 16 ni, rege dulu ga mu omo, eligeligi batun vanu niri
- 17 jili para ivel suri sel ser. Ko ni sete eveligi niri, jinib noeraien ejici, suri ga ni ololi eres, ko elai naus us rege melerin vini tevi kami, ko daron ga nanen elep, ko ololi nolo kami oun saut e nanen ko neiren.
- 18 Ko suri erijen nen nueru oro jige delug, sete para suli nanu tevi nueru.
- 19 Ko Ju niri sopuon ara ivel vini ji Antiok ko Ikonium: ko ara rij tevi delug, ko niri ara tui Pol, ko ara reve ni
- 20 vari gaim nen, ara roromi ni emij. Ko disaipel niri ara tur rerali ni, ni otur evi mari, ko evan gaim nen:
- 21 ko mevi nen ni ebitevi Barnabas poro van Derbe. Ko nueru oro vuissuiseni erijen ga me res tevi vanu nen, ko ololi niri elep ara evi disaipel, ko oro lui keli van
- 22 Listra, ko Ikonium, ko Antiok, oro loli disaipel nemuiri ara res, ko oro iari niri para tur pi terter rege nosurien, ko para rogi uasi drapa sili rege batun
- 23 vanu se Atua rege neriveravijen elep. Mianko oro ligi elder niri teviri, rege kalesia jili, ko ara verus, ko ara vil, nueru oro rij tevi Numal ga mara osuri, suri
- 24 niri. Ko nueru oro ivel rurugi Pisidia, ko oro van
- 25 Pamfilia. Ko nueru oro oerai erijen rege Perca, oro
- 26 jumbul van Atalia; ko oro sa rege drav san poro van Antiok, nutu ga mara ligi nueru tevi deresen se Atua,
- 27 rege majigen ga nueru oro loli osu. Ko oro van nutu nen, ko oro loli kalesia ara lik koroti, nueru oro oerai nanu ga mo su gok ga Atua ololi nueru oro loli uasi, ko ni etasi metali ne nosurien tevi Jentail
- 28 niri. Ko nueru oro lik tevi disaipel niri, nambog elep sopuon.
- 15 Ko jinib sopuon ara jumbul Judia vini, ko ara vuissuiseni tua niri, ara oerai, Pora kami sete kapa lalos, pi repe nololien se Moses, sete kapa loli uasi
- 2 kapa maur. Ko Pol nueru Barnabas oro rij elep sopuon tevi niri, ko oro susi niri suri; ko tua niri ara ligi Pol nueru Barnabas, ko niri sopuon keli, para togsa para van Jerusalem, para susi apostol niri ko
- 3 elder niri suri nesopuuien nen. Ko kalesia niri ara ligi niri rege sel ser, ko niri ara ivel rurugi Fenisia,

- ko Sameria, ara oerai, Jentail niri ara rieni rege sel ser: ko ara loli neirèn elep evan rege tua niri jili.
- 4 Mianko ara van Jerusalem, kalesia niri, ko apostol niri, ko elder niri ara tekai niri, ko niri ara oerai nanu
- 5 jili ga Atua ololi e niri. Ko niri sopuon ne korotian ne Farisi ga mara osuri, ara tur evi mari, ara oerai, Eres niri para lalos, ko drapa oerai niri para loli erijen lilani se Moses.
- 6 Ko apostol niri, ko elder niri, ara lik koroti para
- 7 roromi nanu nen. Ko niri ara sopue elep suri, mianko Piter otur evi mari, ko oerai e niri,
- Tuak niri, kami kama rogi uasi, tui sopuon Atua epej rege ker, ko eligi nu, ga rege nu jigok, Jentail
- 8 niri para rogi erijen ga me res, ko para osuri. Ko Atua ga mu rogi uasi nolo jinib erij suri niri, ko elai
- 9 Nemuin On tevi niri, erepe ni elai tevi ker; ko sete ololi nanu mu nij rege ker ko niri, ololi nolor ouokuok
- 10 suri nosurien. Suri nanu gel, erepe kapa bati Atua, ko kapa ligi nanu pi san rege noue disaipel niri, nanu ga tata se ker ko ker sete drama loli uasi pu uosi?
- 11 Ko ker drama osuri ga ker drapa maur suri deresen se Numal Iesu pi repe niri.
- 12 Ko delug niri ara pereper; ko ara rogi Barnabas nueru Pol oro oerai keli nelelien ko nanu ga mara murarog suri, ga Atua ololi e nueru rege Jentail niri.
- 13 Ko niri ara pereper keli, Jems erij, oerai,
- 14 Tuak niri, kapa rogi inu: Simeon oerai keli, ga uomo Atua evini ji Jentail niri, pi tekai niri sopuon
- 15 par evi jinib sen suri nisen. Ko erijen se profet niri ara oerai erepel; erepe mara uli,
- 16 Nanu gel pu su nu bu lui,
Ko be li keli naim se Devid, ga mi mau;
Ko be li keli e nanu ga mi vitan regen,
Ko bu loli pu tur evi mari:
- 17 Jinib niri ga mara jici uomo para nej Numal,
Ko Jentail niri, ga mara verus nisek reger,
- 18 Numal oerai, ni ga mu loliri ara rogi uasi nanu gel niri, rege daron ga nanu ga mo su gok iel gatan mi remali.
- 19 Suri nanu gel erijen suk evi nanu gel, sete drapa lokoloksi niri ga mara rieni van ji Atua rege Jentail

- 20 niri; ko drapa uli naul teviri, niri para jici nanu ga
mi sij se demij niri ko fornikason, ko nanu ga mara
21 kinsi pini, ko dra. Rege dulu ga tui, niri sopuon ara
vuisuiseni erijen se Moses rege vanu jili, ara evev
rege naim ne lotuen rege Sabat mu muri.
- 22 Ko apostol niri, ko elder niri, ko kalesia jili ara
roromi evi nanu ga me res para ligi jinib sopuon rege
korotian ser, ko para koni niri para van Antiok tevi
Pol ko Barnabas; evi Judas, nisen keli Barsabas, ko
Sailas, nueru or evi jinib ga mi lep rege tua niri:
23 Ko ara uli erepel, ko niri ara tori, Apostol niri ko
tuar ga mara uomo ara uli tevi tuar ga mara evi
Jentail rege Antiok ko Siria, ko Silisia, nama mereni
24 kami: Suri ga kem nama rogi niri sopuon ga mara
ivel ji kem ara lokoloksi kami e erijen, ara rieni
nemui kami; ko kem sete nama lai erijen tevi niri;
25 ko kem nama roromi eres, suri ga nolo kem sansan,
namba ligi jinib sopuon, ko namba koni niri para
vinuk ji kami tevi Barnabas ko Pol ga kem nama
26 mereni nueru, jinib nueru ga sete oro musmus poro
27 mij suri nise Numal se ker, Iesu Kristo. Suri nanu
nen kem nama koni Judas nueru Sailas, ko nueru
28 poro oerai e kami nanu nen, erijen e jigor. Nemuin
On orogi evi nanu ga mi res, ko kem nama rogi evi
nanu ga mi res, sete namba ligi nanu ga mi lep naun
29 rege kami; ko nanu gel eres; kami kapa jici rege
nanu ga mara suli tevi demij, ko kapa jici dra, ko
nanu ga mara kinsi pini, ko fornikason; pora kami
kapa jici nanu nen, di res rege kami. Erimsami.
- 30 Ko niri, ga mara ligiri, ara jumbul ara van Antiok;
ko ara loli delug ara lik koroti, ko ara lai naul nen
31 teviri. Ko niri ara lesi, ara eiri suri nororomien
32 nen. Ko Judas nueru Sailas, ga moro evi profet, oro
vuisuiseni tua niri erijen elep e, ko oro loli niri ara
33 tur eterter. Ko niri ara lik vanu nen nambog sopuon,
34 ko tua niri ara ligi nueru poro ivel tevi demat, poro
35 lui keli poro van ji niri ga mara koni nueru. Ko
Pol nueru Barnabas oro lik Antiok, oro vuisuiseni,
ko oro rij erijen se Numal, ko niri elep ara bitevi
nueru.

36 Mianko, nambog sopuon osu, Pol oerai e Barnabas,
 Drapa lui keli, drapa lesi tua niri rege vanu jili ga
 drama vuisuiseni erijen se Numal, ko drapa lesi niri,
 37 ara lik erepe se. Ko Barnabas emarog pi tekai Jon
 38 pi bitevi nueru, ga nisen keli Marik. Ko Pol sete
 ororomi eres pi tekai ni pi bitevi nueru, meri ga mi
 veligi nueru rege vanu Pamfilia, ko sete ebitevi nueru
 39 rege majigen. Ko nueru oro rij eterter suri, ko oro
 ligeligi nueru oro ivel si samis, ko Barnabas ebitevi
 40 Marik, ko esa evan Saiprus; ko Pol emarog Sailas,
 ko evel, tua niri ara rij eres suri, ko ara ligi nueru
 41 rege deresen se Numal. Ko ni evel rurugi Siria, ko
 Silisia, ololi kalesia niri ara tur eterter.

16 Mianko ni evan Derbe ko Listra: ko kapa lesi,
 disaipel san elik vanu nen, nisen Timoti, tasu sen
 2 evi Ju ga mu osuri; ko tata sen evi meri Kris. Tua
 niri jili ga mara lik Listra ko Ikonium ara rij eres
 3 suri. Ko Pol emarog ni pi bitevi; ko ololi ni elalos
 suri niri Ju ga mara lik vanu nen: niri jili ara rogi
 4 uasi tata sen evi meri Kris. Ko ara ivel suri sel ser
 rege vanu jili, ara lai erijen, niri para tori, erijen
 ga apostol ko elder niri ga mara lik Jerusalem ara
 5 ligi. Ko kalesi niri ara terter e nosurien, ko jinib
 sopuon keli ara bitevi niri mu muri.
 6 Ko nueru oro ivel rurugi vanu ne Frijia ko Caletia,
 Nemuin On ejige nueru, sete poro rij erijen rege
 7 Esia; mianko oro van emauos Misia oro marog poro
 8 van Bitinia; ko Iesu Nemuin ejige nueru; ko oro
 9 asi Misia oro jumbul oro van Troas. Ko Pol
 ematur lesi nanu san natamupog; Elesi jinib san ne
 Masedonia otur, eiari ni, oerai, Kupu asi vini iel Mase-
 10 donia, kupu bitevi kem. Ko ni elesi nanu nen, gavil-
 ivil kem nama pej namba van Masedonia, nama roromi
 Atua everus kem namba vuisuiseni erijen ga me
 res tevi niri.
 11 Ko nama loli drav oulu ligi Troas, kem nama mauos
 nama van Samotresia, ko mevi nen nama van Nea-
 12 polis; ko nama iveligi, nama van Filipi, vanu san ne
 Masedonia, evi batun vanu nen, evi vanu se niri Rom:
 13 ko nama lik vanu nen nambog sopuon. Ko rege

- nambog ne Sabat kem nama van vari metali nen rege jeli nuiserser, nama roromi nutu ga mara verus regen otoi; ko kem nama lik, ko nama rij tevi nevsevin
- 14 ga mara lik koroti. Ko nevsevin san nisen Lidia, ga mo ouloul kalik ga mu sogsog, vanu sen Taiataira, okolotu Atua, ni orogi kem: Numal ololi metali nolon
- 15 etepir pu roromi nanu ga Pol oerai. Ko ni elai baptaisien, tevi naim sen, ko eiari kem, oerai, Pora kami kama roromi nu nueretun rege Iova, kapa vini naim suk, ko kapa lik regen. Ko ni eiari kem elep.
- 16 Mianko eremali erepel, kem nama van nutu ne verusen, ko nevsevin melakil san ga nemuin botut oto regen, eseuit kem, ni elai mani elep tevi master sen, suri botut sen. Ni evijuri Pol ko kem, everus, oerai, Jinib gel ara evi jinib ne majigen se Atua ne Dromsen
- 17 Mari, ko ara oerai e kami sel ne mauren. Ko ni ololi erepok nambog elep. Ko Pol orororomi elep suri, erieni, ko oerai e nemuin, Nu oerai e nik, suri nise Iesu Kristo, kupi vari vinen. Ko eveligi rege daron nen.
- 19 Ko master sen ara lesi nanu ga mi lai noulin evelepa, ara totoni Pol nueru Sailas, ko ara reve van rege nutu
- 20 ga mara okouloule, rege no numal niri, ko ara tekai nueru van rege jaj niri, ara oerai, Jinib gel, oro evi
- 21 Ju, ko oro lokoloksi vanu se ker, ko oro ligi nololien ga sete emauos, ga ker drapa lai ko drapa
- 22 loli, drama evi jinib Rom. Ko delug ara tur evi mari arivisani; ko jaj niri ara reresi tueni sunsun
- 23 seru, ko ara ligi para reviji nueru nai e. Ko ara ligi neriveravijen elep rege nueru, ara ligi nueru naim ne kaien, ko ara oerai eterter meri ga mi metemete naim
- 24 ne kaien pi metemete nueru. Ko ni orogi erijen ser erepok, eligi nueru lolo aim ne kaien ga mu to livu, ko
- 25 ololi belaru eterter rege nai san. Ko erepe natamirag Pol nueru Sailas oro verus, ko oro lai numbo tevi Atua, ko niri ga mara kairi lolo aim ne kaien, ara lik
- 26 ara rogi nueru: Ko gavilivil namue ga mi lep evini, ko batun naim ne kaien ara ririr; ko gavilivil metali jili ara tepir; ko nanu ga mara kai e niri emdarup
- 27 jili. Ko meri ga mi metemete naim ne kaien okulu rege maturen sen, ko elesi metali ne naim ne kaien ara tepir, elai nesip nuval sen, ora pu toro pini ni, ororom:

28 niri ga mara lik naim ne kaien ara oulu. Ko Pol
 everus, drilan evan mari, oerai, Sete kupu lokoloksi
 29 nik: kem jili nama lik iel. Ko ni everus para lai
 nasul vini, ko oulu van jir, ko eririr suri metuen, ko
 30 ouajeni rege no Pol nueru Sailas, ko etekai nueru oro
 van vari, oerai, Numal nueru, bu loli sev, bu tori
 31 mauren ga mu to tui gok vini? Ko nueru oro oerai,
 Kupu osuri Numal Iesu, ko kupu maur, nik, ko niri
 32 jili rege naim som. Ko nueru oro oerai erijen se
 33 Numal tevi ni, ko niri jili lolo aim sen. Ko ni etekai
 nueru daron nen, natamupog, ko ejivile vaseni nutu
 ga mara telemaji; ko ara baptais ni; ni, ko jinib
 34 sen niri jili gavilivil. Ko ni etekai niri ara sa lolo aim
 sen, ko eligi nanen teviri, ko eiri elep, tevi niri jili lolo
 aim sen, niri ara osuri Atua.
 35 Mianko natamerin, jaj niri ara koni jinib ne majigen
 ser, ara oerai, kapa ligeligi jinib gel para ivel.
 36 Ko meri ga mi metemete naim ne kaien oerai e Pol
 erijen nen, jaj niri ara koni para ligeligi kamru
 koporo ivel: kamru koporo vini vari, koporo ivel rege
 37 demat. Ko Pol oerai e niri, ara telemaji komru rege
 no jinib, komru jinib ne Rom, ga sete ara rij emauos
 suri, ko ara sorotueni komru van rege naim ne kaien;
 ko para loli komru nomboro ivel etebitebi rekga?
 bijoponema; niri kes para vini, ko para ligi komru
 38 nomboro ivel. Ko jinib ne majigen oerai e jaj niri
 erijen nen: ko niri ara rogi oro evi jinib Rom, ko ara
 39 medutu; ko niri ara vini, ara eiari nueru; mianko ara
 tekai nueru oro van vari, ara eiari nueru poro iveligi
 40 vanu nen. Ko nueru ori veligi naim ne kaien, ko oro
 sili lolo aim se Lidia: ko oro lesi tua niri, oro loli noler
 omolomol, ko oro ivel.

17 Mianko nueru oro ivel rurugi Amfipolis ko Apolonia,
 ko oro van Tesalonaika, ga naim ne lotuen se niri
 2 Judia otoi: ko Pol evan jir lolo aim erepe nololien sen,
 ko rege nambog ne Sabat itul ni osonue tevi niri rege
 3 naul on, ko evuisuiseni niri, ko oerai evi nanu se
 Kristo ni pu rogi pi sij, ko pu tur evi mari ligi niri ga
 mara mij; ko ni oerai, Iesu gel ga nu nu oerai e

- 4 kami evi Kristo. Ko niri sopuon ara rogi suri erijen
sen, ko ebitevi Pol nueru Sailas; ko niri Kris, ga mara
loli mi mauos, delug elep, ko nevsevin niri elep sopuon
5 ga mara evi nevsevin ga mi lep. Ko lolaren ololi niri
Ju, ko ara lai jinib ga mara sij sopuon rege melig
jinib, ko ara loli delug ara lik koroti, ko ara loli niri
gaim nen ara lat; ko ara van naim se Jeson, ko ara
6 pej para reve niri para van ji delug. Ko sete ara
lesi niri, ara reve Jeson ko tua niri sopuon, ara van
rege no numal ne vanu nen, ara oerai, niri ga mara
7 rieni vanu ara vini iel; ko Jeson etekai niri; ko niri
jili ara loli nanu ga erijen se Sisar ejige, ko ara oerai
8 kig san keli, evi Iesu. Ko ara loli delug niri, ko
numal ne vanu nen, nolor isij suri, ga mara rogi nanu
9 gel. Ko ara loli Jeson ko niri jili ara uli niser suri
ga sete para ivel, ko ara ligeligi niri para ivel.
- 10 Ko gavilivil tua niri ara koni Pol nueru Sailas poro
ivel natamupog, poro van Beria: ko oro van vanu nen,
11 oro sili lolo aim ne lotuen se Ju niri. Ko niri ara res
uomo ne niri Tesalonaika, nolor emarog para lai erijen
gavilivil, ara pej rege naul on mu muri, para rogi uasi
12 pora nanu gel erepel rekga ejici. Ko niri elep ara
osuri; ko nevsevin ga me res ne Kris, ko noroman
13 niri elep sopuon. Ko Ju niri ne Tesalonaika ara rogi
uasi Pol oerai erijen se Atua rege Beria, niri ara van
vanu nen, ara rij tevi delug, ko ara loli nolor ekarakar.
- 14 Ko gavilivil tua niri ara koni Pol pi van galu; ko
15 Sailas nueru Timoti oro lik vanu nen. Ko niri ga
mara ebitevi Pol, ara tekai ni evan Atens: ko ara lai
erijen sen ga Sailas nueru Timoti poro vini jin pigavil,
niri ara ivel.
- 16 Ko daron ga Pol elik Atens, terai niri para vini,
nemuin orogi isij olon ga ni elesi vanu nen oun saut
17 e demij niri. Ko ni osopue lolo aim ne lotuen tevi
Ju niri, ko niri ga mara loli nanu ga mi mauos, ko
rege nutu ga mara ouloule mu muri, tevi niri ga mara
18 lik koroti. Ko niri sopuon ne korotian ne Epikuria,
ko Stoik ara vini jin. Ko niri sopuon ara oerai, Merel
ga me rij nanu naun pu oerai sev? niri sopuon keli ara
oerai, Ni erepe meri ga me ligi atua mu nij: suri ni
19 ovuisuiseni Iesu, ko meraien sen. Ko niri ara totoni

- ni, ko ara tekai ni van rege Areopakus, ara oerai, Ku marog kem namba rogi nevuissuisenien ga mi mer gel
 20 ga nik ku oerai? Nik ku lai nanu gá mara murarog suri vini, rege boro kem : kem nama marog namba rogi
 21 uasi nanu nen evi sev. (Jinib ne Atens niri, ko niri ga mara lik regen, ara loli nanu sansan rege daron ne mosien, ara oerai nanu ga mi mer, ko ara rogi nanu ga
 22 mi mer.) Ko Pol otur rege livu ne Areopakus, ko oerai, Kami jinib ne Atens, nu rogi uasi kami kama pej
 23 nanu elep. Nu vel, ko nu lesi nanu elep ga kami kama lotu, ko nu lesi nauot san, naul gel oto regen, NANU SE ATUA GA SETE ARA ROGI UASI. Nanu ga kami kama rerelegi ko kama lotu, nu nu ligi rege no
 24 kami. Atua ga mu loli gatan, ko nanu jili ga mara to regen, ni evi Numal ne melerin, ko gatan, ko sete
 25 elik rege naim on ga nevere jinib ara loli; ko nevere jinib sete ara loli majigen sen, erepe ni ejici nanu san, suri ga ni esan elai mauren tevi niri jlli, ko elai souin,
 26 ko nanu ga mo su gok; ko rege jinib sansan, ni ololi jinib ne vanu ga mo su gok, para lik rege vanu ga mo su gok iel gatan, ko eligi daron ser, ko nutu ga para
 27 lik regen; suri niri para pej Atua, para para pej e ni, ko para lesi, ko ni sete elik gasu ker san: ker drama lik suri ni, ko drama ivel, ko drama maur suri; erepe kami sopuon ga mara uli numbo ara oerai, Ker dram
 29 evi ni natun. Ko ker dram evi Atua natun, sete eres drapa roromi Atua erepe cold, ko silver, ko nevut, ga nuroguasien ko nevere jinib ara loli.
 30 Daron ga jinib ara rerelegi, Atua sete erij suri; ko leligen ok ni oerai jinib para roromi rege vanu ga mo
 31 su gok: ko ni eligi nambog ga ni pe rij suri vanu, suri nololien ga mi mauos, jinib ga ni eligi, ni pi vi jaj; ko ni oerai erijen nen rege jinib niri jili, suri ni ololi ni otur evi mari ligi niri ga mara mij.
 32 Ko niri ara rogi meraien se niri ga mara mij, niri sopuon ara men ceraji; ko niri sopuon keli ara oerai,
 33 Kem namba rogi keli nik suri nanu gel. Ko Pol eveligi niri erepok. Ko niri sopuon ara bitevi ni, ko
 34 ara osuri: niri san evi Dionisias, ni evi meri Areopakus, ko nevsevin san nisen Damaris, ko niri sopuon keli ara bitevi niri.

- 18** Ko nanu gel osu, ni eveligi Atens, ko evan Korinto.
- 2** Ko ni elesi Ju san, nisen Akuila, ni evi jinib ne Pontus, ko ni evel Itali evini, sete tui, tevi nevsevin sen Prisila, suri ga Klodius oerai Ju niri jili para iveligi
- 3** Rom: ko ni evini ji niri; ko ni elik tevi niri, ko niri ara majig, ni majigen sen ko majigen ser sansan; majigen
- 4** ser evi ara loli kalik ne tent. Ko ni erij lolo aim ne lotuen rege Sabat mu muri, ko eiari Ju niri ko Kris niri para osuri.
- 5** Mianko Sailas nueru Timoti oro ivel Masedonia vini, erijen ololi Pol elep, ko ni evuisuiseni Ju niri, ga Iesu
- 6** evi Kristo. Ko niri ara tur evi mari regen, ko ara rij isij, ni euereleni sunsun sen, ko oerai e niri, Dra kami pu to rege batu kami; nu nu uokuok: leligen ok be
- 7** van ji Jentail niri. Ko ni eveligi nutu nen, evan naim se jinib san nisen Taitus Justus, jinib ga mu
- 8** lotu Atua, ni naim sen oto muri naim ne lotuen. Ko Krispus, batun jinib on ne naim ne lotuen, osuri Numal, tevi naim sen niri-jili; ko niri elep ne Korinto
- 9** ara osuri, ko ara baptaisi niri. Ko Numal oerai e Pol natamupog, ga ni ematur lesi, oerai, Sete kupu
- 10** medutu, kupu rij, sete kupu pereper: nu nu lik tevi nik, ko sete jinib pi san ni van jim pu lokoloksi nik:
- 11** jinib suk niri elep rege vanu gel. Ko ni elik vanu nen sia san ko navul ouon, evuisuiseni erijen se Atua rege niri.
- 12** Ko daron ga Galio evi pro-konsul ne Akaia, Ju niri ara tur evi mari rege Pol, nolor sansan, ko ara tekai
- 13** ni van naim ne jaj, ara oerai, Merel eiari jinib para lotu
- 14** Atua, sete erepe erijen lilani se ker. Ko Pol orogi pe rij, Calio oerai e Ju niri, Pora nanu gel pi vi nanu ne nololien ga sete mi mauos, rekga ceresen ga mi
- 15** sij, O kami Ju, eres nu bu rogi kami: pora pi vi nosurien ne erijen, ko niser, ko erijen lilani se kami, kami kes kapa rogi suri; nu sete nu marog be vi jaj
- 16** rege nanu nen. Ko ni oji tueni niri rege nutu ga jaj
- 17** elik regen. Ko niri jili ara totoni Sostenis, ni evi batun jinib on ne naim ne lotuen, ko ara reviji ni rege no nutu ga jaj elik regen. Ko Calio sete ororomi nanu nen sopuon.
- 18** Ko nanu gel osu Pol elik nambog elep, ko erimse

tua niri, ko esa rege drav pi van Siria, ko Prisila nueru
 Akuila oro bitevi ni; ko ni ekiri jomera batun Senkria :
 19 suri erijen san ga ni oerai. Ko ara van Efeso, ko ni
 eveligi niri : ko ni esili lolo aim ne lotuen, ko osopue tevi
 20 Ju niri. Ko ara oerai ni pi lik sopuon, ko ni
 21 omusmus; ni erimse niri, oerai, pora Atua pi marog,
 bu lui keli vini ji kami, ko esa rege drav, eveligi Efeso.
 22 Mianko ni ojumbul Sesaria, ko otogsa, erij tevi kalesia
 23 niri, ko ojumbul evan Antiok. Ko elik nambog
 sopuon ko evel, evel lilani rurugi vanu ne Caletia,
 ko Frijia, ololi disaipel niri ara lik eres.
 24 Ko Ju san, nisen Apolo, evini Efeso, ni evi meri
 Aleksandria, evi jinib ga mu rogi uasi; ni evuisuiseni
 25 eterter naul on. Ara vuuisuiseni meri nen sel se Iova; ko
 ni nemuin otutun suri, ko erij ko evuisuiseni eres, nanu
 26 suri Iesu, ko orogi uasi baptaisien se John esan: ko
 ni ora pe rij naim ne lotuen, metuen ejici. Ko Prisila
 nueru Akuila oro rogi ni, nueru oro tekai ni, ko oro
 27 vuuisuiseni e ni emauos sel se Atua. Ko ni emarog pi asi
 pi van Akaia, tua niri ara rij eres tevi, ko ara uli naul
 tevi disaipel niri, para tekai ni: ko ni evan jir, ko
 28 ebitevi elep niri ga deresen ololiri ara osuri: ni erij
 eterter tevi Ju niri rege non delug, ololi niri ara rogi
 uasi rege naul on ga Iesu evi Kristo.

19 Mianko eremali erepel, ga Apolo elik Korinto, ko
 Pol evel rurugi vanu ga mari, ko evan Efeso, ko
 2 elesi disaipel sopuon: ko oerai e niri, Kami kama
 lai Nemuin On nambog ga kama osuri? Ko niri ara
 oerai e ni, Ejici, kem sete nama rogi ara lai Nemuin
 3 On teviri. Ko ni oerai, Ara baptaisi: kami van rege
 4 sev? Ko niri ara oerai, Rege baptaisien se Jon. Ko
 Pol oerai, Jon baptaisi bantaisien nolo jinib pu lulului,
 oerai e delug para osuri meri ga pi vijuri ni, evi Iesu.
 5 Ko niri ara rogi nanu gel, ara baptaisi niri van rege
 6 nise numal Iesu. Ko Pol eligi neveren reger, ko
 Nemuin On evan reger; ko niri ara rij nemer munij, ko
 7 ara rij erijen ne profet. Ko niri erepe jinib esegavul
 dromon eru.
 8 Ko ni esili van rege naim ne lotuen, ko erij rege
 navul itul, metuen ejici, erij teviri, ko eiariri suri nanu

- 9 ne batun vanu se Atua. Mianko niri sopuon nolor eterter, ko ara musmus para osuri, ara rij isij suri Sel nen, rege non delug, ni eveligi niri, ko eligi disaipel ara san, ko erij teviri mu muri rege naim on se
- 10 Turanus. Ko ololi erepok rege sia eru; ko niri jili ga mara lik Esia ara rogi erijen se Numal, niri Ju
- 11 ko niri Cris. Ko Atua ololi Pol neveren ololi uasi
- 12 nelelien ga mara elep: ko ara uosi rege nimben, kalik sen sopuon ko sunsun sopuon van rege niri ga mara mesi, ko mesien eveligi niri,
- 13 ko memuiiri ga mara sij ara van vari. Ko Ju niri sopuon ga mara ivel, ga mara loli botut, ara oerai nise Numal Iesu, ara oerai rege niri ga nemuiiri ga mara sij mara lik reger, Nu oerai e Nik suri Iesu ga Pol
- 14 evuisuiseni. Ko Ju san, evi jinib on nisen Siva, ni natun noroman ambut, ko niri ara loli nanu
- 15 nen. Ko nemuin ga mi sij erij lueni, oerai e niri, nu rogi uasi Iesu, ko nu rogi uasi Pol; ko
- 16 kami-kama evi isi? Ko meri ga nemuin ga mi sij oto regen orau van reger, ko eterter uomo nen niri, ko ereviji niri, ko niri ara oulu ligi naim nen ara malamal
- 17 ko ara reviji loloi. Ko niri jili ara rogi uasi nanu nen, niri Ju ko niri Cris ga mara lik Efesus; ko metuen
- 18 evan rege niri jili, ko ara suruvi nise Numal Iesu. Ko niri elep ga mara osuri ara vini, ara rij, ko ara oerai
- 19 nololien ser. Ko niri elep sopuon ga mara loli botut ara lai naul ser vini, ko ara suli rege no niri jili: ko ara evev noulin, ko ara lesi evi silver ogutogutjer
- 20 natar gavul elim. Erepel, erijen se Numal etiv elep, ko eterter.
- 21 Mianko nanu gel osu, Pol ororomi olon pi vel rurugi Masedonia ko Akaia, ko pi van Jerusalem, oerai,
- 22 Mianko be van vanu nen, eres be lesi uasi Rom. Ko ni okoni nueru eru se niri ga mara ebitevi ni, Timoti nueru Erastus, poro van Masedonia, ko ni elik Esia nambog sopuon.
- 23 Rege daron nen niri ara rij tereterer suri Sel nen.
- 24 Jinib san, nisen Demetrius, metusu ne silver, ga mu loli demij silver ne Diana, ko ni elai majigen elep evini
- 25 ji metusu niri; ko ni ololi niri ara lik koroti tevi metusu niri ga majigen ser orsoran, ko oerai, Jinib niri, kami kama rogi uasi majigen gel elai joron tevi

- 26 ker. Kami kama lesi, ko kama rogi, sete rege Efesus
 esan, rege Esia jili Pol gel eiari ko ololi delug elep ara
 27 rieni ligi, oerai, nanu ga nevere jinib ara loli sete ara
 evi atua niri: ko sete nanu gel esan, para lokoloksi
 majigen se ker; nanu gel pu to tevi, naim on se
 Diana, nevsevin ga me vi atua, pi vi nanu naun, ko
 para lai tueni nosuruvien sen, ni ga Esia jili ko vanu
 28 ga mo su gok ara lotu. Ko ara rogi nanu nen, nolor
 oun saut e lolaren, ko ara verus, ara oerai, Diana se
 29 niri Efeso, ni Elep. Ko vanu nen oun saut e
 nevijajigien: ko ara oulu van rege nutu ne korotian,
 nolor sansan, ara totoni Caius nueru Aristarkus, jinib
 ne Masedonia, ga moro ebitevi Pol rege sel sen.
 30 Ko Pol emarog pi van ji delug niri, ko disainel niri
 31 sete ara ligeligi ni pi van. Ko jinib sopuon rege
 numal ga mi lep niri ne Esia, ara evi selen, ara koni
 jinib van jin, ko ara iari ni sete pi van rege nutu ne
 32 korotian. Ko niri sopuon ara oerai nanu san, ko
 sopuon ara oerai nanu mu nij: nolo jinib ne korotian
 ara karakar; ko niri elep sete ara rogi uasi nanu ga
 33 mara lik koroti suri. Ko niri ara tekai Aleksander
 rege delug, Ju niri ara ligi ni rege nor. Ko Aleksander
 euereleni neveren, ko emarog pe rij tevi delug niri
 34 suri. Mianko niri ara rogi uasi ni evi Ju, niri
 jili drilar sansan rege aur eru ara verus, ara oerai,
 35 Diana se niri Efeso, ni Elep. Mianko meri ga mi
 metemete naul ser ololi delug ara pereper, ni oerai,
 Kami jinib ne Efeso, nimbi meri ga sete mu rogi uasi
 ga vanu se niri Efeso emetemete naim on se Diana ga
 36 mi lep, ko demij ga mi vitan rege Jupiter vini? Suri
 ga sete san ololi uasi pu oerai, sete erenok, eres kami
 kapa pereper, ko sete kapa loli nanu san pigavil.
 37 Kami kama tekai jinib gel vini, niri ga sete mara
 evenai rege naim on, ko sete ara rij isij suri atua
 38 se ker, ga me vi nevsevin. Pora Demetrius ko
 metusu niri ga mara ebitevi ni, ara tori nanu san para
 ligi rege jinib ni san, naim ne korotian ara toi, ko
 39 prokonsul ara lik: niri para ligi nanu rege niri. Pora
 kami kama pej nanu mu nij, eres para loli lilani rege
 40 korotian ga mi mauos. Oto muri para ligi nanu rege
 ker suri laten gel leligen, sete nanu san ga drama
 lik koroti suri: pora para rij suri, ker sete drama

41 loli uasi drapa oerai nanu san suri korotian gel. Ko
ni erij erepok, eligeligi korotian para ivel.

20 Mianko laten osupa, Pol ololi disaipel niri ara vini,
ko erij nevuissuisenien teviri, erimse niri, ko evel pi van
2 Masedonia. Ko ni evel rurugi vanu nen, ko elai
3 nevuissuisenien elep teviri, ko evan Kris. Ko ni elik
vanu nen navul itul, ko Ju niri ara sopue ceresen suri
ni pi mij, oto muri ni pi sa rege drav san, pi van Siria,
4 ko ororomi keli pu lui pi vel rurugi Masedonia. Ko
Sopater do Perea, Pirus natun; ko Aristarkus nueru
Sekundus, do Tesalonaika; ko Caius do Derbe, ko
Timoti; ko niri Esia Tikikus nueru Trofimus, ara
5 ebitevi ni van Esia. Niri ara uomo, ko ara lik terai
6 kem rege Troas. Ko nambog ga bred leven ejici
regen osu, kem nam esa, ko drav oulu ligi Filipi, ko
nam van ji niri rege Troas, rege nambog elim; ko
nama lik nambog ambut.

7 Ko rege nambog uomo ne uik, ga kem nama lik
koroti, namba otopoi otovi bred, Pol erij tevi niri, ora
8 pi vel mevi nen; ko erij eperiv ejepari nata mirag. Ko
nasul elep rege naim mari ga kem nama lik koroti.
9 Ko melakil san, nisen Iutikus elik rege metali nen,
meten oruel elep; ko Pol erij eperiv, ni meten oruel
elep, ko ouajeni rege naim mari itulin, ko ara uosi ni
10 emij. Ko Pol ojumbul, ko ouajeni regen, ko eraki,
ko oerai, Sete kapa vijajig; mauren sen oto regen.
11 Ko ni evan keli mari, ko otopoi otovi bred, ko aan, ko
12 erij eperiv tevi niri, ejepari natamerin, ko ni evel. Ko
niri ara uosi nanuarig nen emaur, ko nolor omolomol
suri.

13 Ko kem nama uomo van rege drav, ko oulu nambin
pi van Asos, nama ora namba lai Pol; ni eligi erepok,
14 ko ni ora pi kali gauti. Ko ni elesi kem rege Asos,
15 ko nama lai ni, ko nama van Mitilini. Ko drav oulu
ligi nutu nen, ko mevi nen oto muri Kios; ko mevi keli
16 nama vut Samos; ko mevi nen keli nama van Miletus.
Pol oerai kem namba asi Efesus, ni sete emarog pu
lolola rege Esia; ni ora pi van pigavil, nora pu loli uosi,
ni pi lik Jerusalem nambog ne Pentekost.

17 Rege Miletus ni okoni niri sopuon para van Efesus,
 18 para verus elder niri ne kalesia para vini jin. Ko
 niri ara vini jin, ni oerai e niri.

Kami jili kama rogi uasi, rege nambog uomo nen ga
 nu nu verasi dan ne Esia, erepe ga nu lik tevi kami
 19 nambog jili, nu loli majigen se Numal, tevi nolak ga
 sete mi van mari, ko tevi suan metek, ko tevi nanu
 20 ga mi sij ga mu loli nu, nololien ga mi sij se Ju niri: ko
 nu sete nu medutu bu oerai e kami nanu jili ga me
 res, ko nu vuissuiseni rege nutu ga mara lik koroti
 21 regen, ko rege naim evises, nu oerai Ju niri, ko Cris
 niri, nolo jinib pu lulului pi van ji Atua, ko nosurien
 22 rege Numal se ker, Iesu Kristo. Ko leligen ok, kapa
 lesi, nu be van Jerusalem, nemuin ololi nolak, ko sete
 nu rogi uasi nanu ga para loli nu rege nutu nen:
 23 nanu ga nu rogi uasi, Nemuin On oerai e nu rege
 vanu jili, ga dil ne kaien, ko neriveravijen ara to terai
 24 nu. Ko sete nu roromi mauren suk evi nanu san,
 ko mauren sete eres rege inu, pora bu loli majigen
 suk, ko nanu ga Numal Iesu elai tevi inu, evi nanu
 gel, be rij suri erijen ga me res ne deresen se Atua.

25 Ko leligen ok, kapa lesi, Nu nu rogi uasi, kami jili
 ga nu vel tevi, ko nu oerai lilani batun vanu, sete
 26 kapa lesi keli nok. Suri nanu gel, nu oerai e kami
 27 leligen, nu nu uokuok rege dra jinib niri jili. Nu
 sete nu medutu nu oerai e kami, nevuisuisenien
 28 jili se Atua. Kapa metemete lueni kami, ko melig
 jili, ga Nemuin On eligi kami kama evi jinib ga mara
 metemete niri, ko kapa ougani kalesia se Atua, ga ni
 29 ouli, ko ni dran evi noulin. Nu nu rogi uasi ga nu
 be vel, ulif ga mara sij para sili vini ji kami, para
 30 lokoloksi melig; ko rege kami, jinib sopuon para
 tur evi mari, para rij erijen ga mi kapil, para tekai
 31 disaipel sopuon para vijuri niri. Suri nanu gel, kami
 kapa kulukulu, ko kapa roromi, rege sia itul, nu
 sete nu mosi nu vuissuiseni kami jili, natamupog ko
 32 natamerin tevi suan metek. Ko leligen ok nu ligi
 kami van ji Atua, ko van ji erijen deresen sen, ga mu
 loli uasi para eli kami mari, ko pi lai meligen rege
 33 niri jili ga mara res. Nu sete nura be lai silver

- 34 se jinib pi san, ko cold sen, ko sunsun sen. Kami
 kama rogi uasi neverek gel emajig rege nanu ga nu
 35 nu lai, ko niri ga mara ebitevi nu. Rege nanu
 jili nu lai eksampel tevi kami, ga kami kapa majig ko
 kapa ebitevi niri ga mara malum, ko kapa roromi erijen
 se Numal Iesu, ga ni oerai, Eres elep jinib pi lai nanu
 tevi jinib, uomo ne ni pi lai nanu se jinib.
- 36 Ko ni oerai erijen nen, ko ejiba, ko everus, tevi
 37 niri jili. Ko niri jili ara tig elep, ko ara raki Pol,
 38 ko ara rumiji, ara roromi elep uomo nen suri erijen
 ga ni oerai, ga niri sete para lesi keli non. Ko niri
 ara ligi ni rege sel sen, ni pi van rege drav.

- 21** Mianko eremali erepel, ga kem nama iveligi niri,
 ko drav se kem oulu nambin, kem nama mauos van
 rege Kos, ko mevi nen van rege Rodes, ko nama iveligi
 2 nutu nen nama van Patara: ko nama lesi drav san
 pi van Fenisia, ko nama sa regen, ko oulu nambin.
- 3 Mianko nama lesi Saiprus, nama asi rege nevere
 imair se kem, ko drav se kem oulu nambin evan
 Siria, ko nama jumbul Tair: nutu ga drav pi ligi nanu
 4 ga mu to regen. Ko nama lesi disaipel niri, kem
 nama lik nambog ambut: ko niri ara oerai e Pol e
 5 Nemuin, ni sete pi verasi dan ne Jerusalem. Mianko
 nama lik nambog nen osu, kem nama ivel, nama van
 rege sel se kem; ko niri jili ko nevsevin ser, ko natur,
 ara ebitevi kem rege sel se kem, ko nama iveligi vanu
 6 nen, ko nama jiba galu, ko nama verus, ko kem nama
 rimse niri; ko nama sa rege drav nen, ko niri ara lui
 keli van sim ser.
- 7 Mianko kem nama iveligi Tair, ko nama van Toli-
 mais; ko nama rimse tua niri, ko nama lik tevir
 8 nambog san. Ko mevi nen nama ivel, ko nama van
 Sesaria: ko nama sili van lolo aim se Filip ga me vi
 jinib nevuisuisenien, ni evi san rege niri ambut, ko
 9 kem nama lik tevi. Ko meri nen, natun nevsevin
 10 ivij, ga sete ara eli, ga mara rij erijen ne profet. Ko
 kem nama lik nutu nen nambog elep, ko profet san,
 11 nisen Acabus evel Judia vini. Ko ni evini ji kem,
 ko elai netatu se Pol, ko ekai totoni ni belan ko

neveren, ko oerai, Nemuin On oerai erepel, Ju niri rege Jerusalem parà kai totoni pi repel, jinib ga netatu
 12 sen gel, ko para lai ni tevi nevere Jentail niri. Ko kem nama rogi nanu gel, kem, ko jinib niri ne vanu
 13 nen, nama eiari ni sete pu togsa pi van Jerusalem. Ko Pol oerai, Kami kama loli sev, kama tig ko kama loli nolok emauor? nu nu marog para kai totoni nu,
 14 ko be mij Jerusalem suri nise Numal Iesu. Mianko ni sete ora pu rogi kem, nama pereper, nama oerai, Numal Iesu pu loli marogen sen.

15 Mianko nambog nen osu, nama uosi nanu se kem,
 16 ko nama togsa nama van Jerusalem. Ko niri sopuon, disaipel ne Sesaria ara ebitevi kem, ara tekai disaipel ga tui san, Neson do Saiprus, ga kem namba lik naim sen.

17 Mianko kem nama van Jerusalem, tua niri ara tekai
 18 kem, ko ara iri. Ko mevi nen Pol evan ji Jems, ko
 19 kem nama van; ko elder niri jili ara lik koroti. Ko ni erij teviri, mianko oerai si samis nanu ga Atua
 20 ololi rege Jentail niri, e ni majigen sen. Ko niri ara rogi, niri ara suruvi Atua; ko ara oerai e ni, Nik ku lesi, Tuak, niri natar elep rege Ju niri ga mara osuri;
 21 ko niri jili ara mereni elep erijen lilani: ko jinib ara oerai e niri suri nik, ga nik ku vuissuiseni Ju niri jili ga mara lik rege Jentail niri, para iveligi Moses, ku oerai niri sete para loli natur para lalos, ko sete para
 22 vijuri nololien nen. Ko pi repe se? niri para rogi
 23 nik ku vini iel. Nik kupu loli nanu gel ga kem nama oerai e nik: Jinib ivij ara lik, ga mara oerai erijen
 24 san. Nik kupu biteviri, ko kupu lolim kupu uokuok tevi niri, ko nik kupu ouli suri niri, ga para kiri batur: ko niri jili para rogi uasi nanu ga mara oerai suri nik sete evi uretunen; para rogi uasi ga nik ku vel
 25 emauos, ku loli erijen lilani. Suri Jentail niri ga mara osuri, kem nama uli, nama lior ga niri sete para jepari nanu ga mara suli tevi demij, ko para jici dra,
 26 ko nanu ga mara kinsi pini, ko fornikason. Ko Pol etekai jinib nen niri, ko mevi nen ololi ni ouokuok tevi niri, ko evan rege temnel, oerai nambog ga niri ara uokuok regen osu, ejepari nambog ga mara lai nanu sopuon suri niri jili.

- 27 Mianko nambog ambut .oto muri pu su, Ju
niri ga mara ivel Esia vini, ara lesi ni
rege tempel, ko ara loli nolo delug ara karakar,
28 ko ara totoni ni, ara verus, ara oerai, Jinib ne Israel,
kapa bitevi kem: Merel evi jinib ga mi vuisuiseni jinib
niri jili rege vanu ga mo su gok, niri para musmus
delug, ko erijen lilani, ko vanu gel: ko nanu san keli,
ni etekai niri Cris ara vini rege tempel, ko olokoloksi
29 vanu gel. Suri ga mara lesi ni etekai Trofimius do
Efeso, gaim, ko ara roromi Pol etekai ni van rege
30 tempel. Ko nolo niri jili ne vanu nen ara karakar
suri, ko niri jili ara oulu koroti: ko ara totoni Pol,
ko ara reve ni vari ne tempel: ko ara kikiore metali
31 gavilivil. Ko ara ora para reviji pini, ko san oerai
e batun jinib moramoru ne melig jinib nuval, ga
32 Jerusalem niri jili ara lat. Ko gavilivil ni etekai jinib
nuval niri, ko kapten niri, ko oulu jumbul van reger:
ko niri ara lesi batun jinib moramoru, ko jinib nuval,
33 ara iveligi ga mara reviji Pol. Ko batun jinib mora-
noru evini muri, ko orototoni ni, ko oerai para kai
otoni ni dil nevut pi eru; ko osusi ni evi si, ko ololi
34 ev. Niri sopuon ara kail, ara oerai e nanu san,
h niri sopuon nanu mu nij rege delug: ko ni sete
oli uasi pu rogi uasi uretunen, suri drilar elep, ko
otai para tekai ni van rege naim se jinib nuval.
35 Manko ni evan rege sel ga mara sa regen, eremali
erbel, jinib moramoru ara uosi ni, ko delug ara tutiri
36 etter; delug niri jili ara vijuri, ara kail, ara oerai,
Kai reviji pini.
- 37 Manko ara ora para tekai Pol pi van lolo aim se
jinibuval, ni oerai e batun jinib moramoru, Ku marog
bu oai e nik nanu san rekga? Ko ni oerai, Nik ku
38 rogi asi erijen Cris rekga? Nik sete ku vi meri
Ijip raga? rege nambog uomo nen ni ololi nolo jinib
ara kakar, ko etekai van rege meruer jinib niri ga
39 mara ni Asasin, niri natar ogut elen. Ko Pol oerai,
Nu nui Ju san, do Tarsus ne Silisia, nu vi jinib ne
vanu gmi lep san: ko nu eiari nik kupu ligeligi nu
40 be rij ti delug niri. Ko ni eligeligi, ko Pol otur
rege sehen, oluv e neveren e delug; ko niri ara
pereper i, ni erij tevi niri, nali ne Ibru niri, oerai,

22 Tuak ko tata niri, kapa rogi erijen suk, ga nu bu oerai e kami.

2 Ko niri ara rogi ga ni erij teviri e nali Ibru, niri ara pereper elep: ko ni oerai,

3 Nu nu vi Ju, nu ak Tarsus ne Silisia, ko ara ligi nu nu lik vanu gel, rege Cameliel belan, ara vuisuiseni nu nololien ga mi mauos ne erijen lilani se tata se ker, ko nu terter suri Atua, erepe kami jili leligen:

4 ko nu nu reviji Sel gel, pi van rege mijen, nu kai totoni, ko nu ligi rege naim ne kaien noroman niri ko nevsevin niri. Ko batun jinib on, ni pu oerai suri p

5 repel, ko korotian ne elder niri jili: ko niri ara lai nau tevik, ga pi van ji Tua niri, ko nu vel be van Damaskus, be kai totoni niri ga mara lik, ko be tekai ni para van Jerusalem, para reviji niri. Mianko eremali erepel, ga nu vel suri sel suk, oto muri Damaskus, nial ouosoput, gavilivil muron ga mi lep ne melerin cor

7 rerali nu. Ko nu uajeni van gatan, ko nu rogi dran san oerai e nu, Sol, Sol, erepe ku reviji inu? Ko nu oerai, Nik ku vi si, Numal? Ko ni oerai e nu, N nu

9 vi Iesu do Nasaret, ga nik ku reviji. Ko ni ga mara ebitevi nu ara lesi muron nen, ko sete ararogi drila meri ga me rij tevi inu. Ko nu nu oera, Nu

10 bu loli sev, Numal? Ko Numal oerai e nu, Kuu tur evi mari, kupu van Damaskus; ko para oera e nik rege vanu nen nanu jili ga mara ligi ga nik kuu loli.

11 Mianko sete nu kulu uas suri nanu ne muron n, niri ga mara ebitevi nu ara totoni neverek, ko ara tkai nu, ko nu van Damaskus. Ko jinib san, nisen Aanaias,

12 jinib ga mi res rege erijen lilani, ko Ju ni jili ga mara lik vanu nen ara rij eres suri, ni evij jik, ko otur muri nu, oerai, Tuak Sol, kupu kulu ki pi res.

13 Ko nu kulu eres rege daron nen, ko nu eteni ni. Ko ni oerai, Atua se tata se ker eligi nik kupu rogi

14 uasi marogen sen, ko kupu lesi Meri ga M'nauos, ko kupu rogi drilan rege ni jigon. Nik kuu vi jinib

15 noeraien sen rege jinib niri jili, suri nanga nik ku lesi ko ku rogi. Ko leligen ok, erepe r ku lolola?

16 kupu tur evi mari, para baptaisi nik, I kupu jivili tueni nololien ga mi sij som, ko kupu vus ni nisen.

17 Ko eremali erepel, ga nu lui keli van Jerusalem, ko nu

- 18 verus rege tempel, nematur lesien ololi nu, ko nu lesi
ni oerai e nu, Kupu ivel pigavil, ko kupu iveligi Jeru-
salem pigavil: suri ga niri sete para lai erijen noeraien
19 som suri inu. Ko nu oerai, Numal, niri ara rogi uasi
nu nu ligi niri rege naim ne kaien, ko nu reviji rege
20 naim ne lotuen jili niri ga mara osuri nik: ko nambog
ga mara loli dra Stifen, jinib noeraien som, mu jum-
jum, nu nu tur muri, ko nu marog, ko nu metemete
21 sunsun se niri ga mara reviji pini ni. Ko ni oerai e
nu, Kupu ivel: bu koni nik kupu van gasu ji Jentail
niri.
- 22 Ko niri ara rogi ni ejepari erijen nen; ko ara loli
drilar evan mari, ara oerai, Kapa lai tueni meri ga
23 mi repel rege iel gatan: sete eres ni pi maur. Ko
niri ara kail, ko ara sorotueni sunsun ser, ko ara
24 ijereni mau evan mari, ko batun jinib moramoru
erai para tekai ni van lolo aim se jinib nuval, oerai
niri para telemaji ni, ko para susi, ni nu rogi uasi nanu
25 ga me vi batun ga niri ara kail suri ni. Ko ara kai
toon ni dil ga mi terter, Pol oerai e senturion ga mu
to muri, Evi nanu ga mi mauos rekga, nik kupu
telmaji jinib ga me vi jinib Rom, ko sete ara ligi
26 nari san regen? Ko senturion orogi, ni evan ji batun
jinil moramoru, oerai e ni, ko oerai, Nik kupu loli
27 sev? merel evi jinib Rom. Ko batun jinib mora-
moruevini, oerai e ni, Kupu oerai e nu, nik ku vi jinib
28 Rom ekga? Ko ni oerai, O. Ko batun jinib mora-
moru oerai, Nu ligi mani elep, nu ouli korotian ne
batun anu nen. Ko Pol oerai, Nu nu ak, nu vi meri
29 Rom. Ko gavilivil niri ga mara ora para susi ni, ara
iveligi: ko batun jinib moramoru imdutu, suri ni ekai
totoni, o mu rogi ni evi meri Rom.
- 30 Ko mi nen, ni ora nu rogi uretunen ga Ju niri
ara rij sri, ni etelasi, ko oerai batun jinib on niri,
ko korot niri jili para vini, ko etekai Pol evan jir,
ko eligi tge no niri.

- 23** Ko Pol, emeteni eterter korotian niri, oerai, Tuak niri, Nu nu lik rege Atua non rege nololien lilani jili, 2 ejepari leligen. Ko Ananaias, ga me vi batun jinib 3 on, oerai niri ga mara tur muri, para uti ni jigon. Ko Pol oerai e ni, Atua pu ti nik, ga me vi jeli naim ga moeraperap, nik ku sakel, kupu rij suri inu, suri erijen lilani, ko ku oerai para uti nu, sete emauos rege 4 erijen lilani. Ko niri ga mara tur muri ara oerai 5 Nik ku souri batun jinib on se Atua rekga? Ko Pd oerai, tuak niri, nu sete nu rogi uasi ni evi batun jinib on: ara uli erepel, Nik sete kupu rij pi sij suri 6 numal se jinib som niri. Ko Pol elesi niri sopuon re korotian ara evi Sadusi, ko sopuon ara evi Farisi, ni everus rege korotian, oerai, Tuak niri, nu nu vi Fansi, ko nu vi Farisi natun: ko niri ara rij suri inu, suri 7 neteravien ne meraien se niri ga mara mij. Ko ni oerai nanu gel, erijen laten otur evi mari rege Farisi 8 niri, ko Sadusi niri: ko korotian evi eru. Sadusi niri ara oerai meraien ejici, ko agelo, ko nemuin ara jici: 9 ko Farisi ara oerai ara toi. Ko laten ga mi le otur evi mari: ko jinib ne naul sopuon se Farisi nri ara tur evi mari, ara rij eterter, ara oerai, Kem set nama lesi nanu ga mi sij san rege jinib gel: ko eepe se, 10 pora nemuin san erij tevi ni, rekga agelo san? Mianko laten ga mi lep otur evi mari, batun jinib moramoru imdutu tara reve pini, oerai jinib nuval pa jumbul ko para ereve tueni ni rege niri, ko para teai ni van naim se jinib nuval.
- 11 Ko natamupog nen, Numal otur muri n ko oerai, Kupu rogi pi res: erepe nik ku oerai suri inu rege Jerusalem, pi repel, nik kupu rij suri in Rom.
- 12 Mianko natamerin, Ju niri ara lik korot ko ara ligi erijen san, ceresen bijici, ara oerai niri sete para aan ko sete para minemin pijepari daron ga para reviji 13 pini Pol. Niri gavul ivij ko dromon toi ga mara 14 evi korotian nen. Niri ara vini ji batu jinib on niri ko elder niri, ko ara oerai, Kem nama li erijen ga mi lep san, ceresen bijici, sete namba an pijepari ga 15 namba reviji pini Pol. Suri nanu nerkami, ko korotian, kapa oerai batun jinib moramoru pi tekai vini ji kami, erepe kami kapa rogi uasi utunen, ko kapa rij lilani suri; ko ni sete euor pi vini suri, kem namba

- 16 reviji pini. Ko Pol metulu sen orogi niri ara lik terai, ko ni evan, esili lolo aim se jinib nuval, ko
 17 oerai Pol. Ko Pol everus senturion san evan jin, ko oerai, kupu tekai nanuarig gel van ji batun jinib mora-
 18 moru, ni otori nanu san pu oerai e ni. Ko ni etekai, ko ebitevi van ji batun jinib moramoru, ko oerai, Pol, ga mara kai, everus nu van jin, ko oerai nu be tekai melakil gel van jim, ni otori nanu san pu oerai e nik.
- 19 Ko batun jinib moramoru orototoni neveren, ko etekai ni etebitebi, osusi, Sev ko ga nik ku ra kupu oerai e
 20 nu? Ko ni oerai, Ju niri ara sopue para oerai e nik kupu lai Pol vini rege korotian, mevi, erepe nik kupu
 21 susi ko kupu rogi uasi uretunen jili suri ni. Ko nik sete kupu marog nanu ser: niri gavul ivij ko dromon otoi ara lik terai ni, ara ligi erijen ga sete pi vi ceresen, sete para aan ko sete para minemin, pijepari daron ga para reviji pini ni: ko niri ara loli lilani, ko ara
 22 lik terai ga nik kupu oerai. Ko batun jinib on elige-ligi melakil nen pi vel, oerai ni eterter, Sete kupu oerai jinib pi san ga nik ku oerai e nu nanu gel niri.
- 23 Ko ni everus senturion eru van jin, ko oerai, Koporo loli lilani jinib nuval ogut varu para van Sesaria, ko niri ga mara sakel rege hors gavul ambut, ko niri ga mara uosi siri ogut varu, para van rege aur itulin ne
 24 nambog. Ko ni oerai niri para lai hors sopuon, ko Pol pi sakel rege san, ko para tekai ni pi res, ni van
 25 ji numal Feliks. Ko ni oli naul san erepel.
- 26 Klodius Lisius oerai e numal ga me res Feliks, kupu lik pi res.
- 27 Ju niri ara totoni jinib gel, ko oto muri niri para reviji pini, ko nu nu van jir tevi jinib nuval niri, ko nu
 28 tekai tueni, nu rogi ni evi jinib Rom. Ko nura bu rogi uasi nanu ga me vi batun ga niri ara rij suri, nu
 29 tekai ni evan ji korotian ser: ko nu rogi niri ara ligi rege ni nosusien ne erijen lilani ser, ko sete ara ligi nanu san regen, eres ga ni pi mij suri, rekga para kai
 30 totoni suri. Mianko nu rogi niri ara lik terai ni, gaviliyi nu koni ni evan jim, ko nu oerai niri ga mara rij mi sij suri ni, para rij suri rege nom.
- 31 Ko jinib nuval nen ara tekai Pol, erepe numal ser oerai, ko ara ebitevi ni natamupog evan Antipatris.

- 32 Ko matamerin ara iveligi niri ga mara sakel rege hors
 para ivel tevi, ko niri ara lui van naim se jinib nuval :
 33 ko niri ara van Sesaria, ko ara lai naul tevi numal
 34 nen, ko ara ligi Pol rege non. Ko ni elesi naul nen,
 ko osusi ni vanu sen, ko orogi ni evi meri Silisia,
 35 oerai, Bu rogi nanu som nambog ga niri ga mara
 rij suri nik para vini : ko oerai para metemete ni lolo
 aim ga mi lep se Erod.

- 24 Mianko nambog elim osu, Ananaias ga me vi batun
 jinib on ojumbul vini, tevi elder niri sopuon, ko batun
 jinib ne erijen san nisen Tertulus ; ko ara vuissiseni
 2 Numal suri Pol. Ko ara verus ni vini, Tertulus erij
 suri, oerai,

Suri ga nik ku loli kem nama lik eres rege demat,
 ko nik ku roromi, ko ku jige nanu ga mi sij rege
 3 batun vanu gel, ko kem nama rogi eres mu muri rege
 vanu ga mo su gok, ko nama iri suri, Feliks ga mi
 4 res. Ko sete nura bu loli nik kupu timbetimbet, nu
 iari nik pi vi marogen som, kupu rogi kem erijen sete
 5 elep. Ko kem nama lesi jinib gel evi meri ga mi sij,
 ko meri ga mu loli nuval rege Ju niri rege vanu ga
 mo su gok, ko ni evi batun rege korotian ne Nasarin
 6 niri : ko ni emarog pu lokoliksi tempel : ko kem nama
 8 orototoni ni : ko nik ku loli uasi kupu susi ni, ko kupu
 9 rogi uasi nanu jili ga kem nama ligi rege ni. Ko Ju
 niri ara ebitevi, ara oerai nanu jili erepok.

- 10 Ko numal oluv ga ni pe rij, Pol erij lueni erepel,
 Suri ga nu rogi uasi ga nik ku vi jaj rege batun
 vanu gel sia elep, nu rogi eres be rij suri nanu ga mara
 11 ligi rege inu : ko nik kupu rogi uasi, leligen evi bogen
 esegavul dromon eru ga nu nu togsa van Jerusalem
 12 pu lotu : ko sete ara lesi nu nu sopue tevi jinib san,
 rekga nu loli nolo delug ara karakar, rege tempel,
 13 rekga lolo aim ne lotuen, rekga gaim nen. Ko nanu
 ga mara ligi rege inu, niri sete ara loli uasi pi vi
 14 uretunen. Ko nu oerai e nik nanu gel, rege Sel ga
 mara oerai korotian san, nu nu loli majigen se Atua
 se ker, nu osuri nanu jili ga erijen lilani oerai, ko

15 profet niri ara uli: ko nu tori neteravien se Atua,
 ga niri ara lik terai, evi nanu gel, meraien se niri ga
 16 mara res ko niri ga mara sij pi vini. Rege nanu gel nu
 majig nolok pi tep e nanu ga mi sij rege Atua ko jinib
 17 mu muri. Ko sia elep osu nu vini nu tori merenien,
 18 ko nanu ga mara ligi, van ji batun vanu suk: ko nu ligi,
 niri ara lesi nu, nu uokuok rege tempel, sete nu bitevi
 delug, ko laten ejici: ko Ju niri sopuon ga mara ivel
 19 Esia vini ara lik, ko eres niri para tur rege nom, para
 rij suri, pora para tori nanu san para ligi rege inu.
 20 Pora bijici, jinib gel niri para oerai nanu ga mi sij ga
 21 mara lesi, daron ga nu nu tur rege no korotian, erijen
 sansan ga nu nu verus, nu tur rege niri, nu oerai, suri
 meraien se niri ga mara mij; niri ara rij suri inu leligen
 rege no kami.

22 Ko Feliks, ni orogi uasi uretunen ne Sel nen, oerai
 ejiciuor, oerai, Mianko Lisias, batun jinib moramoru
 23 pu jumbul vini, be rij suri nanu se kami. Ko ni oerai
 e Senturion pi metemete ni pi res, ko pu loli pi res tevi;
 ko sete pi jige selen niri para ebitevi ni.

24 Mianko nambog sopuon osu, Feliks evini, tevi
 Drusila nevsevin sen, ni evi nevsevin Ju, ko oerai Pol
 pi vini jin, ko orogi ni suri nosurien rege Iesu Kristo.
 25 Ko ni erij suri nololien ga mi mauos, ko nololien ga
 mi res, ko korotian ga ni vini, Feliks imdutu elep, ko
 oerai, Kupu ivel suri sel som rege daron gel; mianko
 rege daron ga mi res suk, nu be verus keli nik kupu
 26 vini jik. Ko ni ororomi Pol pi lai mani tevi: ko
 27 everus ni evini mu muri, ko erij tevi. Mianko sia eru
 osu Porsius Festus evijuri Feliks: ko Feliks emarog
 pu loli Ju niri para mereni ni, eligeligi Pol pi lik naim
 ne kaien.

25 Ko Festus evini rege vanu nen, elik nambog itul, ko
 2 otogsa ligi Sesaria evan Jerusalem. Ko batun jinib
 3 on niri, ko batun jinib ne Ju, erij tevi ni suri Pol; ko
 ara eiari ni, pora ni pi marog pu oerai ni pi vini
 Jerusalem; ko para lik terai para reviji pini rege sel.
 4 Ko Festus oerai, ara metemete Pol Sesaria, ko oto
 5 muri ni pi van. Ko ni oerai, kami ga kama tori

numalnen rege kami, kapa jumbul tevi inu, pora nanu san isij rege merenen, niri para ligi regen.

- 6 Mianko ni elik tevi niri, nambog sete elep, erepe ouil rekga esegavul, ko ojumbul van Sesaria; ko mevi nen ni esakel rege nai seksakel se jaj, ko oerai para
 7 tekai Pol vini. Ko ni evini, Ju niri ga mara jumbul Jerusalem vini, ara tur ererali ni, ko ara ligi nanu elep regen, nanu ga mi sij, ga sete ara loli uasi pi vi
 8 uretunen; ko Pol erij suri nololien sen, oerai, Nu sete nu loli nanu san isij rege erijen lilani se Ju niri, ko
 9 rege tempel, ko rege Sisar. Ko Festus emarog pu loli Ju niri para mereni ni, erij lueni tevi Pol, ko oerai, Nik ku marog kupu togsa van Jerusalem, ko para rij
 10 lilani suri nanu gel niri rege nok, rege vanu nen. Ko Pol oerai, Nu nu tur rege no nai seksakel se jaj se Sisar, nutu ga para rij suri regen: sete nu loli nanu san isij
 11 tevi Ju niri, ko nik ku rogi uasi jili erepok. Pora nu nu vi jinib ga mu loli mi sij, pora nu loli nanu san ga jinib pi mij suri, nu sete nu musmus be mij: pora nanu gel sete evi uretunen, nanu ga mara ligi rege inu, sete jinib san ololi uasi pi lai nu tevi niri. Nu marog Sisar
 12 pe rij suri. Ko Festus osopue tevi korotian, ko oerai, Nik ku oerai Sisar pe rij suri: nik kupu van si Sisar.
- 13 Mianko nambog sopuon osu, kig Acripa nueru
 14 Bernisi oro vini Sesaria, ko oro rij tevi Festus. Nueru oro lik nambog elep, ko Festus eligi nanu se Pol rege kig, oerai, jinib san gel ga Feliks eligi rege naim ne
 15 kaen: ko nambog ga nu nu lik **Jerusalem, batun** jinib on niri, ko elder niri ne Ju ara vuissuiseni nu suri
 16 ni, ara oerai nu be rij suri ni. Ko nu nu oerai e niri, sete evi nololien se kem Rom para lori tueni jinib san, pu omo ga meri ga mara ligi nanu regen, ko niri ga mara ligi nanu nen para tur, nor rege nor, ko ni pi ligi
 17 erijen sen suri nanu ga mara ligi regen. Mianko niri ara vini iel, ara koroti, nu sete nu lolola, ko mevi nen nu sakel rege nai seksakel se jaj, ko nu oerai para
 18 tekai jinib nen vini. Ko niri ga mara ligi nanu regen ara tur evi mari, niri sete ara ligi nanu ga mi sij san regen, erepe nu nu roromi para ligi suri; ejici, niri
 19 ara ligi nesopuien ne lotuen ser regen, ko suri san
 20 Iesu, ga mi mij, ko Pol oerai ni emaur. Ko nu, nu

rerelegi bu susi suri nanu nen, nu susi pora ni pi marog
pi van Jerusalem, ko para rij suri nanu nen, rege vanu
21 nen. Mianko Pol oerai nu be ligi ni pi lik terai erijen
se numal ga mi lep, nu oerai para ligi ni pi lik terai
22 nambog ga bu koni ni vi van ji Sisar. Ko Acripa
oerai e Festus, ko nu nu marog bu rogi merenen. Ko
ni oerai, nik kupu rogi ni mevi.

23 Ko mevi nen Acripa evini, nueru Bernisi, tevi
nosuruvien elep, ko ara sili van nutu ga mara rij regen,
tevi batun jinib moramoru niri, ko batun jinib ne vanu
24 nen, Festus oerai para tekai Pol vini. Ko Festus
oerai, Numal Acripa, ko jinib niri jili ga mara lik iel
rege nok, kami kama lesi jinib gel, ga delug jili ne Ju
niri ara rij tevi nu suri, rege Jerusalem ko iel, ara
25 kail, ara oerai sete eres ni pi maur nambog pi san. Ko
nu nu lesi ni sete ololi nanu san ga pi mij suri: ko ni
oerai ni emarog numal Rom pe rij suri, ko nu nu oerai
26 bu koni ni pi van jin. Ko nu sete nu tori nanu san
uretun bu li tevi numal suk suri. Suri nanu gel nu
tekai ni vini rege no kami, ko rege nik nom, numal
Acripa, drapa kulu pej, ko bu tori nanu sopuon ga
27 bu li. Nu roromi sete evi nanu ga mi res, bu koni
jinib ne kaien, ko sete bu oerai nanu ga mara ligi
regen.

26 Ko Acripa oerai e Pol. Ara ligeligi nik kupu rij
suri nik. Ko Pol esarini neveren, ko eligi erijen sen,
oerai:

2 Nu eiri numal Acripa be rij suri inu rege nom leligen,
3 suri nanu jili ga Ju niri ara ligi regek: suri ga nik ku
rogi uasi emauos nololien niri jili ko nosusien niri jili se
Ju niri: ko nu eiari nik kupu rogi nu, sete kupu
4 timbetimbet. Ju niri jili ara rogi uasi nololien suk
ga nu nu lik nu vi nanuarig ejepari leligen, ga nu lik
5 uomo rege jinib suk, ko rege Jerusalem; ara rogi uasi
nu tui, pora para marog para rij suri, nu nu lik, nu vi
Farisi, rege korotian ga mi mauos uomo nen, ne lotuen
6 se ker. Ko leligen ok nu tur iel, para rij suri nu, suri
7 neteravien ne nanu ga Atua oerai e tata se ker; metili
naim esegavul dromon eru se ker, ara majig eterter se

- Atua, ko ara roromi para lai neteravien nen. Ko suri neteravien nen, O numal, Ju niri ara ligi nanu regek.
- 8 Erepe kami kama roromi evi nanu sete uretun, pora Atua pu loli niri ga mara mij para tur evi mari keli.
- 9 Uretun nu nu roromi olok, eres nu bu loli nanu pi
- 10 lep, isij rege nise Iesu do Nasaret. Ko nu loli nanu nen Jerusalem: ko nu kai jinib ga mara res niri elep rege naim ne kaien, ga batun jinib on ara lai numalnen tevik, ko nambog ga mara reviji riniri nu nu ligi erijen
- 11 suk reger. Ko nu reviji niri mu muri, naim ne lotuen jili ser, ko nu majig eterter bu loli niri para rij pi sij; ko nu lolar elep suri niri, nu reviji niri rege vanu gasu.
- 12 Mianko nu vel be van Damaskus, nu toti numalnen
- 13 ko naul se batun jinib on, ko nial ouosoput, O numal, nu lesi rege sel, muron ne melerin, oror elep uomo ne nial, oror ererali nu ko niri ga mara ivel tevi inu.
- 14 Mianko kem jili nama uajeni gatan, ko nu rogi drilan san oerai e nu erijen Ibru, Sol, Sol, erepe ku reviji
- 15 inu? evi nanu ga mi terter nik kup etepavi siri. Ko nu nu oerai, Nik ku vi si, Numal? Ko Numal oerai,
- 16 Nu nu vi Iesu, ga nik ku reviji. Kupu tur evi mari, kupu tur rege belam: nu remali jim suri nanu gel, be ligi nik kupu evi jinib ne majigen ko jinib noeraien rege nanu gel niri ga nik ku lesi inu, ko nanu gel ga
- 17 be remali keli jim suri; be metemete nik rege delug, ko rege Jentail niri ga nu bu konim kupu van jir, kupu loli meter para kulu, para rieni ligi nanu ga mi malik,
- 18 van rege nanu ga mi mor, ko rege derteren se Setan, van ji Atua, ko para lai netelasien ne nololien ga mi sij, ko para lai nanu ser rege niri ga mara uokuok
- 19 suri nosurien rege inu. Suri nanu gel, O numal Acripa, nu sete nu musmus bu loli nanu ga nelesien ne
- 20 melerin: nu oerai e niri Damaskus uomo, ko niri Jerusalem, ko rege vanu jili ne Judia, ko rege Jentail niri, ga nolo niri pu lulului ko para rieni van ji Atua, ko para loli majigen, eres rege niri ga nolor olulului.
- 21 Suri nanu gel Ju niri ara totoni nu rege tempel, ko
- 22 ara marog para reviji pinik. Mianko nu lai derteren ga mi vel ji Atua evini, nu nu tur ejepari leligen, nu oerai suri, rege niri ga ualili ko niri ga mi lep, sete nu oerai nanu mu nij, nu oerai ranu ga profet niri, ko

- 23 Moses, ara oerai para vini; evi ga Kristo pu rogi pi sij, ko ni uomo ne niri jili pi mera liöi niri ga mara mij, ko pi vuissuiseni muron tevi delug, ko Jentail niri.
- 24 Ko ni erij erijen sen erepok, Festus oerai, drilan evan mari, Pol, nik ku legeleg, nuroguasien elep som, 25 ololi legelegen som otoi. Ko Pol oerai, Nu sete nu legeleg, Festus ga mi res; ejici, nu rij erijen uretunen, 26 ko nanu ga mi mauos. Ko kig orogi uasi nanu gel niri, ko nu rij elimijer tevi ni: nu rogi uasi nanu gel niri sete san etebitebi e ni; sete ara loli nanu nen rege 27 nutu ga mara tebitebi. Numal Acrina nik ku osuri profet niri, rekga ejici? Nu rogi uasi nik ku osuri. Ko 28 Acripa oerai e Pol, rege neiarrien ga ualili, nik ku marog kupu loli nu be vi Kristian. Ko Pol oerai, Nu 29 verus Atua, pora neiarrien ualili rekga elep, sete nik kupu san, ejici, niri jili ga mara rogi nu leligen, para sorsan e inu, ko dil ne kaien gel para jici reger.
- 30 Ko kig otur evi mari, ko numal, ko Bernisi, ko 31 jinib niri ga mara lik teviri: mianko ara ivel, ara rij tevi niri, ara oerai, Merel sete ololi nanu san ni pi 32 mij suri, rekga para kai totoni suri. Ko Acripa oerai e Festus, Pora merel sete oerai Sisar pe rij suri, drapa ligeligi ni pi vel.
- 27** Mianko ara oerai kem namba sa rege drav, nan'hi van Itali, ara lai Pol ko jinib ne kaien sopuon keli, tevi senturion san nisen Julius, ne melig ne Acastas.
- 2 Ko nama sa rege drav san ne Adramitium, ga oto muri pu oulu nambin, pi van rege vanu niri ne galu Esia, ko oulu nambin, ko Aristarkus, meri ne Masedonia ne 3 Tesalonaika ebitevi kem. Ko mevi nen nama ejepari Saidon: ko Julius ololi eres tevi Pol, ko eligeligi ni pi 4 van ji selen niri, pu mosi sopuon. Ko nama oulu keli nambin, nama kali rege deuvjen Saiprus, suri ga lig 5 isij. Ko nama oulu nambin rege dis ga mu to muri Silisia ko Pamfilia, ko nama van Maira, gaim san ne 6 Lisia. Rege nutu nen senturion elesi drav san ne 7 Aleksandria, ga pi van Itali; ko eligi kem regen. Ko drav oulu emijemij nambog elep, ko ara majig elep

- ara loli evan no Naidus, ko lig isij, sete nama loli uasi namba van, ko nama oulu nambin rege deuvjen
- 8 Krit, rege no Salmone; ko nama majig elep nama oulu kali gaut, nama van vanu san nisen Sal Emalum; oto muri gaim san nisen Lasea.
- 9 Ko nama lik nambog elep, ko sete eres drav nu oulu, suri daron ga Mara vil asipa. Ko Pol evuisuiseniri,
- 10 oerai e niri, Numal niri, nu rogi uasi pora drap su, drapa lokoloksi, ko drana loli nanu pi lep para jijici, nanu ga mu to rege drav, ko mauren se ker pu to tevi.
- 11 Ko Senturion ororomi, erijen se kapten, ko meri ga
- 12 drav nen evi sen, uomo ne nanu ga Pol oerai e. Suri sal nen sete eres ga para lik regen, rege daron melas, niri elep ara oerai eres drav pu oulu ligi, pora para loli uasi para jepari Feniks, ko para lik regen, rege daron melas, evi sal san ne Krit, oto emauos e droueli
- 13 ko naun. Mianko narosin eser bembelen, niri ara roromi pi repe ga mara oerai, ko ara uosi agkor, ko
- 14 oulu jeli Krit, oulu muri gaut. Ko daron sete elep lig ga mi ravij, nisen Eurakuilo, eser gaut vini ko ereviji:
- 15 ko elai drav nen, ko drav sete ololi uasi pi mauos e
- 16 lig, ko nama rieni, ko nama oulu suri lig. Ko oulu rege noru ne nurur ga ualili san, nisen Kauda, nama
- 17 majig eterter ko nama loli uasi nama uosi boat: ko ara uosi mari, mianko ara kai totoni drav dil e; ko ara medutu drav pi van rege Sirtis, ara lai tueni nambin ko
- 18 oulu naun. Ko nama majig elep rege lig ga mi lep, ko mevinen ara sorotueni nanu ga mu to rege drav;
- 19 ko nambog itulin niri ara uosi nanu ne drav, ko ara 20 sorotueni. Mianko sete nama lesi nial ko moju nambog elep, ko lig eravij elep rege kem, ko
- 21 neteravien ga kem namba maur osu jili. Ko ara lik nambog elep ko sete ara aan, Pol otur rege livu niri, ko oerai, Numal niri, eres ga kami kapa rogi nu bognevis, ko sete kapa iveligi Krit, ko drav gel sete pi sij, ko
- 22 nanu sete para jijici. Ko leligen ok nu eiari kami kapa rogi pi res: suri ga sete kami san ni mij, drav esan
- 23 pi jijici. Natamupog gel agelo se Atua ga nu nu vi sen, ko nu loli majiøen sen, otur tevi inu, oerai,
- 24 Sete kupu medutu Pol; nik kupu tur rege no Sisar: ko kupu lesi, Atua elai tevi nik niri jili ga mara esa tevi

- 25 nik. Suri nanu gel, numal niri, kapa rogi pi res: nu
 nu osuri Atua, pi remali pi repe ga mu oerai e nu.
- 26 Ko nanu gel, drav pi mauor rege nurur san.
- 27 Mianko nambog esegavul dromon ivij evini, lig
 ereviji kem rege dis Adria, erepe natamirag, jinib ne
- 28 drav ara roromi evini muri vanu san; ko ara jumbuli
 dil, ko ara lesi fatom gavul eru; ko bembelen keli ara
- 29 jumbuli dil ko ara lesi fatom esegavul dromon elim. Ko
 ara medutu drav pi van gaut, nutu ga nevut mu toi,
 ara jumbuli agkor ivij rege batun drav, ko ara lik
- 30 terai nataperin. Mianko jinib ne drav ara pej para
 oulu ligi drav nen, ko ara jumbuli boat van rege dis,
 ara oerai para jumbuli agkor rege no drav, ko Pol oerai
- 31 e senturion ko jinib nuval niri, Pora niri para iveligi
 32 drav kami sete kapa loli uasi pi maur. Ko jinib
 nuval niri ara teve tueni dil ne boat, ko ara ligeligi pi
- 33 vitan. Ko oto muri nataerin Pol eiari niri para lai
 nanen sopuon, oerai, Leligen evi nambog esegavul
 dromon ivij ga kami kama lik, ko sete kama aan, sete
- 34 kama lai nanu sopuon. Ko nu eiari kami kapa lai
 nanen sopuon: suri mauren se kami: sete jomera batu
- 35 kami san pi jijici. Ko ni oerai nanu gel, ko elai
 bred sopuon, ko erij eres tevi Atua suri, rege no niri
- 36 jili: ko otopoi otovi, ko aan. Ko niri jili nolor eres,
 37 ko niri ara lai nanen. Ko nemui kem jili ga nama
 lik rege drav nen, ogut varu bulen gavul ambut dromon
- 38 ouon. Ko niri ara aan jili, ara loli drav isisaro,
 39 ara sorotueni uit van rege dis. Mianko nataerin,
 niri sete ara lesi uasi vanu nen: ko ara lesi bulojin
- 40 san, galu nen eres, ko ara sopue pora nara loli uasi
 drav pu oulu van regen. Ko ara sorotueni dil ne
- 41 agkor niri, ara iveligiri rege dis, ko ara telasi dil ne
 niuos uolu niri: ko ara uosi nambin uomo nen, pi lai
- 42 lig, ko oulu van gaut. Ko evan rege nutu san ga dis
 eru oro seuit, drav evan gaut: ko non ereviji, ko otur
 eterter, ko daptap ga mara elep ololi batun emauor.
- 42 Ko jinib nuval niri ara sopue nara reviji pini jinib ne
 kaien niri, pora bijici niri nara elog, ko para oulu.
- 43 Ko senturion emarog pu loli Pol pi maur, ejige niri;
 oerai niri ga mara elog uas para jumbul, ko para

44 ouomo gaut: ko niri ga mara vitu, sopuon rege niriv,
ko sopuon rege nanu ne drav. Ko eremali erepel,
niri jili ara van gaut ara maur.

28 Mianko nama van gaut, nama rogi uasi nurur nen
2 evi Melita. Ko jinib nen ara loli eres elep tevi kem: ara
loli namb oror, ko ara tekai kem jili. suri naus us ko
3 melas. Ko Pol eseraki namb sopuon, ko eligi rege
namb ga mi en, numet ga mi sij san orogi otutun, ko
4 evini, ko aji totoni neveren. Ko jinib nen niri ara lesi
numet nen orul rege neveren, niri ara oera e niri,
Uretun merel evi jinib ga mi reviji pini jinib, ko oulu
5 ligi dis, ko Justis sete pi ligeligi ni ni maur. Ko ni
ouereleni numet nen van rege namb, ko sete orogi isij.
6 Ko niri ara roromi ni pu sol, rekga pu uajeni pi mij
pigavil: ko ara lik terai eperiv, ko sete ara lesi nanu
san isij evan regen, nolor ara rieni, ko ara oera ni
evi atua san.

7 Oto muri nutu nen, dan sopuon otoi, se Pablias,
numal ne nurur nen; ni etekai kem ko emetemetem kem
8 eres nambog itul. Ko Pablias tata sen ematur emsi,
mesien doualul ko osusuari: ko Pol evan jin, ko everus,
9 ko eligi neveren regen, ko ololi emaur. Ko nanu gel
osu, niri jili ga mesien oto reger rege nurur nen, ara
vini, ko ara maur; ko niri ara loli eres tevi kem, nanu
10 elep: mianko kem nama ivel, ara liori rege drav nanu
jili ga kem namba tori.

11 Ko navul itul osu, kem nama oulu nambin rege drav
san ne Aleksandria, drav nen oto rege nurur nen rege
12 daron melas, nisen Melu Noroman. Ko nama vut
13 Sairakus, ko nama lik nambog itul. Ko nama ivel,
nama oulu evail, ko nama van Rejiun: ko nambog
sansan osu, naru eser, ko mevi nen nama van
14 Puteoli: ko nama lesi tuar niri, ko ara iari kem namba
15 lik nambog piambut: mianko nama van Rom. Rege
vanu nen, tua niri ara rogi suri kem, ara vini ara seuit
kem, rege Nutu ga mara kouloul se Apius, ko Naim
itul: ko Pol elesi niri, ni erij eres tevi Atua, ko nolon
eterter suri.

16 Mianko kem nama van Rom, ara ligeligi Pol pe lik,
ni esan, tevi jinib moramoru ga mi metemetem ni.

- 17 Mianko eremali erepel, nambog itul osu ni everus korotoni jinib ga mi lep niri rege Ju niri: ko niri ara lik koroti, ni oerai e niri, tuak niri, nu sete nu loli nanu san rege delug, ko rege nololien se tata se ke, ko ara ligi nu rege naim ne kaien Jerusalem, ko ara
- 18 lai nu van rege nevere jinib Rom niri: ko niri ara rij suri nu, ara marog para ligeligi nu be vel, suri ga sete
- 19 nanu san oto regek, nu be mij suri. Ko Ju niri ara rij suri, ara loli nu nu oerai e Sisar; sete nanu san
- 20 otoi ga be rij pi sij suri batun vanu suk. Suri nanu gel nu eiari kami, kapa lesi nu, ko kapa rij tevik: suri neteravien ne Israel, ara kai totoni nu dil nevut
- 21 gel. Ko niri ara oerai e ni, Niri Judia sete ara uli naul tevi kem suri nik, ko tua niri sete ara vini para
- 22 oerai lilani, rekga para rij nanu san isij suri nik. Ko kem nama marog namba rogi e nik nanu ga nik ku roromi: suri korotian nen, kem nama rogi uasi niri jili ara rij isij suri.
- 23 Ko niri ara ligi nambog san, ko niri elep ara vini jin lolo aim sen; ko ni evuisuiseni niri, ko erij suri batun vanu se Atua, ko ololi niri ara osuri Iesu, rege erijen lilani se Moses, ko rege profet niri, nata
- 24 mururupog ejepari nata miriverivi. Ko niri sopuon ara osuri erijen ga mu oerai, ko sopuon sete ara
- 25 osuri. Mianko niri sete ara roromi nanu sansan, ko ara ivel, evitu ga Pol oerai e erijen san, Nemuin On
- 26 erij eres e Aisea profet, tevi tata se kami, oerai,
 Kupu van ji jinib gel niri, ko kupu oerai,
 Kapa rogi nurogien, ko sete kapa rogi uasi;
 Ko kapa lesi nelesien, ko sete kapa lesi uasi:
- 27 Nolo jinib gel isij,
 Ko boror ouonouon,
 Ko meter ara pil;
 Pora para lesi rege meter,
 Ko para rogi rege boror,
 Ko para rogi uasi nolor,
 Ko para rieni keli,
 Ko bu loli niri para maur.
- 28 Ko kami kapa rogi uasi suri, Atua elai mauren sen gel tevi Jentail niri: ko niri para rogi.

30 Ko ni elik sia eru osu lolo aim ga ni ouli,
31 ko etekai niri jili ga mara vini jin, evuisuiseni batun
vanu se Atua, ko oerai lilani nanu suri Numal Iesu
Kristo, metuen ejici, ko sete san ejige ni.





